



顧亭林先生年譜
附錄

一





顧亭林先生年譜

附錄

(一)

張穆編

謹案本朝學業之盛。亭林先生實牖啓之。而洞古今。明治要。學識咳貫。卒亦無能及先生之大者。聞桐城胡雒君虔。嘗爲先生撰次年譜。惜未之見。大興徐丈松鉤稽各書。依年排纂。已寫有定本。會何太史紹基自金陵來。攜有上元車明經守謙。號秋舫所輯譜。互用勘校。車氏差詳。蓋車氏本之崑山吳廣文映奎。號銀帆而吳氏又本之先生撫子衍生也。徐丈欲更事釐訂。以出守榆林未遑。穆乃不自揆度。比而敍之。綜兩譜之異同。究大賢之本末。世之景行先生者。尙其有考於斯。道光二十三年五月朔日。平定後學張穆記。

顧亭林先生年譜卷一

清 平定張 穆編

明萬曆四十一年癸丑五月二十八日先生生。

先生初名絳更名繼紳後仍名絳字忠清。

元譜。穆案復社姓氏畧山弟六人顧絳字忠清。

乙酉後更名炎武。

徐譜圖百詩與劉超宗書作炎午。穆案山東通志采

先生文亦作炎午。

字甯人學者稱亭林先生。

元譜華亭東南三十五里有顧亭林湖其南有顧亭林陳顧野王嘗居此修輿地志因以爲名其地今爲寶雲寺。

穆案輿地紀勝嘉興府古蹟有顧亭湖在華亭縣南三十五里。

舊經云黃門侍郎顧野王居此無林字。又海鹽縣東有顧林亭有陳顧野王讀書堆東坡顧林亭詩云平林豈舊物歲晚室扶疏云云。唐詢詩云平林標大道曾是野王居云云。宋輝詩云昔時高士宅今日梵王居云云。林亭字凡兩見皆不作亭林。然據下所引東坡詩云平林豈舊物唐詢詩云平林標大道似乎華亭海鹽兩縣境內皆有一亭。因野王納稱灑水則曰顧亭湖傍樹則曰顧亭林。傳鈔誤倒作林亭爾。近志於湖上並增林字亦誤也。至宋輝梵王居云云則又與華亭之寶雲寺其事適同不知輝即指華亭故蹟而象之誤繫之海鹽下否。又案宋嘉祐六年法雲寺重修大殿記弟一行題云大宋秀州華亭縣顧亭林法雲寺重修大殿記此顧亭林三字之見於石刻者。又嘗稱名曰圭年。元譜康熙中題吳縣李灌溪侍御詩署名曰圭年。謙案歛孝廉程易

晴瑤田云嘗見萬年少自跋所作秋江別思圖送先生由淮陰渡江歸唐市謂顧子名圭年自云余再轉注而得此名。

亦或署蔣山傭。

元譜謙案蔣山即鍾山後更名神烈山先生嘗僑居山下也。穆案江藩漢學師承記庚寅有怨家欲陷

之僞作商賈。變姓名為蔣山備。又鄒平縣志前列修志姓氏。有顧備。字甯人。崑山人。同時較編疑備。即備字之譌。亦或單署曰備也。顧氏系出吳郡。五代之際。徙滁州。南宋時有名慶者。

自滁徙海門之姚劉沙。見先生顧氏譜系攷。姚劉沙。自注。今崇明縣。又鈔書自序。炎武之先。家海上。世為儒。慶次子伯善。又徙崑山。遂為崑山縣人。世居

縣之花蒲保。譜系攷。崑山縣之二十四保。地名花蒲。自注。今太倉州六都。後徙千墩。元譜。崑山縣之千墩人。謙案。崑新合志。千墩在城東南三十六里。泖川鄉。徐譜。先生家與徐健庵比鄰。見憺園集。舅母朱孺人壽序。穆案。蘇

州府志。崑山縣第宅園林內。載妙喜園。在西關外。金童橋北。初為嚴氏園。徐坦齋營為別墅。荷池竹園。踞西郊之勝。徐乾學宅在半山橋西。堂曰冠山堂。復構傳是樓。聚書其中。宅後有園曰憺園。又有遂園。在馬鞍山北麓。徐秉義第。在富春橋西。有培林堂。徐元文宅。在半山橋東。塘內有含經堂。園中有古樟一株。因名得樹園。蓋徐氏鼎貴後。父子兄弟各營第宅。不復與顧氏為鄰矣。厥後健庵兄弟。欲迎先生南歸。以別業居之。殆指金童園亭歟。自慶而下。十二世至明正德間。曰

南京工科給事中。廣東按察使司僉事。漆。譜系攷。漆。字梁卿。號小涇。正德庚午舉人。辛巳進士。刑科給事中。濟。譜系攷。濟。字舟卿。號思軒。正德丙子舉人。丁丑進士。歷官行人

刑科給事中。何紹基案。類姓登科攷。於顧漆。注崑山縣人。顧濟。顧章志。顧紹芳。皆注太倉州人。穆案。鈔書自序。先高祖。為給事中。當正德之末。又衍生繕寫書目。有思軒公諫垣疏一卷。又蘇州府志。給事中顧濟第。在崑山縣尚書浦西。蔣涇。刑科生

兵部侍郎章志。譜系攷。章志。字子行。號觀海。嘉靖丙午舉人。癸丑進士。歷官行人。行人司副。行人司正。刑部員外郎。中。江西饒州府知府。湖廣廣西按察司副使。貴州布政司參政。貴州山東按察司按察使。南京光祿寺卿。應天府尹。南京兵部

右侍郎。贈都察院右都御史。徐譜。南京朝天宮後。有侍郎公祠。又日知錄云。余家有嘉靖年買地文契。蓋在侍郎公時。又浯溪碑歌序云。萬曆元年。先曾祖官廣西按察副使。穆按。衍生繕寫書目。有觀海公船政疏一卷。又車譜云。章志。字行之。據譜系攷。作子行。嘗

是車誤。又鈔書自序。嘉靖間家道中落。先曾祖繼起爲行人。使嶺表。而倭闖入江東。郡邑所藏之書。與其室廬俱焚。無子遺焉。泊萬曆初。而先曾祖歷官至兵部侍郎。中間歷方鎮三四清介之操。雖一錢不以取諸官。而性獨嗜書。往往出俸購之。

侍郎生

左贊善、紹芳。

譜系攷。紹芳字實甫。號學海。萬曆丙子舉人。丁丑進士。翰林院簡討。經筵日講官。左春坊。左贊善。兼翰林院編修。管理制誥。贈左春坊左庶子。車譜。紹芳選庶吉士。移疾歸。起補檢討。父喪服除。進經筵日講官。遷左贊善。後移疾歸。

不兩年卒。年四十七。穆案。鈔書自序。祖贊善公文集。至數百篇。衍生繕寫書目。有學海公寶庵集。十二卷。靜志居詩話。實甫工於五律。不露新穎。矜鍊以出之。頗有近於孟襄陽。高蘇門者。又王世貞作紀。遠近交游四十詠。紹芳其一也。蘇州府志。崑山縣。有遺清堂在

柴巷內。宮贊

順紹芳所居。及國子生紹芾。譜系攷。紹芾字德甫。號蠡源。生員。增例入國子監。車譜。紹芾天才俊逸。工詩古文。奇奧秀拔。在太

紀事闕文序。臣祖生於饒州官舍。隨臣曾祖之官廣西。山東。南京。一切典故悉諳。而當日門戶與攻門戶之人。兩黨之魁。皆與之游。臣祖年七十餘矣。足不出戶。猶日夜念廟堂不置。閱邸報。輒手錄成帙。細字草書。一紙至二千餘字。自萬曆四十八年至崇禎七年九月

共二十五帙。又鈔書自序。先祖書法蓋逼唐人。性豪邁。不羣。然自言少時日課鈔古書數紙。今散亡之餘。猶數十帙。贊善、生官廕生、同應。譜系攷。紹芳子二。長曰同德。生員。次曰同應。字仲從。廩生。萬曆乙卯戊午副榜。恩廕入國子監。

穆案。同應。又字寶瑤。見憺園集。曰。公清修篤學。負東南重望。蘇州府志文苑門。同應生十歲而孤。哀毀如成人。長而穎敏好學。精舉子業。工詩文。爲諸生。七試不售。兩中副榜。卒年四十二。性闊達。家雖貧。好施與。卒之日。戚友哭之。幾於罷市。所著有藥房秋嘯等集。明詩綜引王平仲語云。仲從詩詞澹意遠。有白雲自出山泉冷然之致。娶何氏。穆案。憺園集。先妣顧太夫人行述曰。母何夫人。淹洽書史。爲女工師。舅母朱孺人壽序曰。支持門戶。茶苦百端。家兒爭若詩集序。外王母何夫人。知書有識鑒。同應之子五。先生其仲也。穆案。同應五子。長曰緗。字遐蒙。次即先生。次曰紆。字子嚴。次曰纒。字子叟。次不知其名。字子武。先生一女兒。一女弟。皆嬪於徐女兒。

生履忱。女弟生健庵。兄弟又一女兄嫁陳皇士濟生。健庵寄皇士太僕詩注。太僕夫人余從母也。是也。然元譜稱健庵太夫人為先生弟五妹。又有仲姊適馬氏。則女兄弟之可考者亦四人也。

紹芾生同吉。早卒。元譜謙案同吉字仲

逢崑新合志。謂其早卒無子。產頗饒。聘王氏。未婚守節。撫先生為嗣。徐譜。貞孝之歸顧。當在萬曆二十九年辛丑。其年貞孝十六歲。車譜。貞孝太僕寺卿字孫女。諸生述女事。載明史本傳。乃餘集。先妣王碩人行狀。

四十三年乙卯三歲。

先生患痘。頗危。及脫痂。左目為眇。元譜。謙案。全謝山神道表。謂先生雙瞳子。中白而邊黑。見者異之。不

是年。本生父賓瑤公中式副榜。元譜。

知縣陳君祖苞。拜於貞孝之廬。穆據行狀補。進士履歷便覽。祖苞字令威。海鹽人。萬曆癸丑進士。歷官順天巡撫。明史

附顏繼祖傳。

四十四年丙辰四歲。

七月。先生第五妹生。穆補。憺園集。先妣行述。吾母生於萬曆丙辰七月二十八日未時。

四十六年戊午六歲。

春。白氣亘天。自東而北。元譜。穆案。三朝紀事闕文序。自臣母授臣大學之年。而東方兵起。白氣亘天。明年三月。覆軍殺將。夏。四月。大清兵克撫順。七月。克清河堡。

徐譜

貞孝以大學授先生。元譜

賓瑤公鄉試，又中副榜。徐譜

冬十一月，蠡源公配李碩人卒。元譜 穆案，碩人有兄名箕，見先生所作

先妣行狀

四十七年己未七歲

二月，經略楊鎬、誓師於遼陽。總兵官李如柏、杜松、劉綎、馬林分道出塞。三月甲申，杜松遇大清兵於吉林崖，戰死。乙酉，馬林兵敗於斐芬山，兵備僉事潘宗顏戰死。庚寅，劉綎深入阿布達里岡，戰死。六月大

清兵克開原，馬林敗沒。徐譜

先生就塾。元譜 徐譜，日知錄云：愚幼時四書本經俱讀全注。

四十八年庚申八歲

秋七月，神宗崩，光宗立。甫一月崩，熹宗立。時朝議欲以明年為泰昌元年，左光斗請以七月以前為萬

曆四十八年八月以後為泰昌元年從之。元譜

本生母弟紆子嚴生

元譜 謙案，崑新合志，紆字子嚴，同應第三子，少負經濟才，明亡後，絕意仕進，隱居千墩舊廬，居喪哭過哀，目途盲，秉性耿介，兄炎武講學秦晉，屢徵不赴，紆寓書益相砥礪，甥徐乾學兄弟，勢望方隆，紆獨養高

自重華陰王宏撰稱其閣修於
不見不聞之地不媿隱君子

天啟元年辛酉九歲

三月大清兵取瀋陽遼陽徐譜

先生讀周易元譜 季弟纘子安生徐譜案子安妻朱氏健庵有舅母朱孺人壽序

二年壬戌十歲

正月大清兵破西平堡取廣寧徐譜

蠡源公命先生讀古兵家孫子吳子諸書及左傳國語國策史記元譜 穆案三朝紀事闕文序天啟初元遼陽陷者崇明安邦彥並反其明年廣寧陷山東白

蓮教妖民作亂一日臣祖指庭中草根謂臣曰爾他日得食此幸矣遂命之讀古兵家孫子吳子諸書及左傳國語戰國策史記

先生程正夫詩序余自少時侍於先王父其終日言而無擇者皆祖考之世德鄉先生之行事徐譜

三年癸亥十一歲

蠡源公以資治通鑒授先生元譜 穆案鈔書自序先祖自炎武十一歲即授之以溫公資治通鑒曰世人多習綱目余所不取凡作書者其病平其以前人之書改竄而為自作也

穆案先生所作先妣行狀。吾母居別室中。晝則紡績。夜觀書。至二更乃息。尤好觀史記通鑿。及本朝政紀諸書。而於劉文成。方忠烈。于忠肅。諸人事。自炎武十數歲時。卽舉以教。

四年甲子十二歲。

始習科舉文字。元譜。穆案。三朝紀事闕文序。臣祖故所與往來老人。謂臣祖曰。此兒頗慧。何不令習帖括。乃爲是闕遠者乎。於是令習科舉文字。已遂得爲諸生。

五年乙丑十三歲。

時有納穀寄學之例。蠡源公以先生天資穎異。合早取科名。遂爲先生應例。元譜。謙案。明時寄學。亦經提學考取歲試後。準作附生。

六年丙寅十四歲。

讀通鑿畢。讀書詩春秋。麻城周提學邦基。取入本學二十二名。庠名繼紳。元譜。先生入學在十三歲。謙案。先生撰寇公墓志。謂天啟六年。寇公

爲蘇州知府。某年十四。以童子見公。被一言之弊云云。則入學當是十四。入復社有名。徐譜。常熟王峻次山作先生傳。年十四爲諸生。入復社。有名。松案。吳應箕所編復社姓氏目錄前卷。崑山縣入社者十八人。先生名在第六。先生乙卯歲。

孫徵君葬詩引云。適吳中有傳示同社名氏者。感觸之意。遂見乎詞。穆案。靜志居詩話。甯人早年入復社。與同邑歸莊齊名。賓瑤公卒。先生居降服憂。元譜。

先生答徐公肅書云。幼時侍先祖。自十三四歲。讀資治通鑿後。卽示之以邸報。徐譜。

崇禎元年戊辰十六歲。

陝西饑流賊大起。徐譜

歲試惠安陳提學保泰未發落即告病去祇取賞卷蔡復襄以下十二人先生未與。元譜

先生與潘次耕書云自庚申至戊辰邸報皆曾寓目。徐譜

穆案三朝紀事闕文序先帝即位天下翕然以為中興更化之主無復向時危迫之意又當先帝頒孝經小學釐正文字之日臣乃獨好五經及宋人性理書而臣祖乃更誨之以為士當求實學凡天文地理兵農水土及一代興革之故不可不熟究

三年庚午十八歲

六月流賊陷府谷。徐譜

六月科試上虞李提學懋芳拔先生卷列一等二十名。元譜

是年先生當應鄉試日知錄載是年應天鄉試題舉直錯諸枉能使枉者直以媚奄諸臣初定逆案也

徐譜

穆案是年先生弟五妹歸同邑太僕少卿徐君應聘之孫開法。應聘萬曆癸未進士翰林院檢討開法字茲念號坦齋恩貢生時年十七

四年辛未十九歲

八月大清兵圍大凌城。閏十一月登州游擊孔有德反。徐譜

二月歲試李提學連任。先生卷列一等十一名。仍更名絳。元配太倉王孺人來歸。元譜

是年甥徐乾學生。徐譜乾學字原一號健庵官至刑部尙書

五年壬申二十歲。

正月孔有德陷登州。九月流賊連陷山西州縣。徐譜

三月歲試鄰水甘提學學潤拔先生卷列一等十四名。元譜

六年癸酉二十一歲。

二月流賊犯畿南河北。七月大清兵取旅順。十一月流賊渡河陷澠池諸縣。分掠南陽汝寧。遂犯湖廣。

徐譜

正月科試甘提學連任。先生名列三等。元譜

本生母兄緡遐冢中式順天舉人。元譜謙案崑新合志緡天才俊逸世傳其兩京賦埒平子時務

策比長沙。年未四十卒。徐譜緡以天下多故好言兵事舉鄉試一上公車而卒見健庵舅母朱孺人壽序緡有同年長沙陶汝鼐見先生楚僧元瑛談三十年來事詩注穆案靜志居詩話陶汝鼐字仲調壯歲好游自吳入越晚際世離出監軍事捍禦鄉邦有力

是年，甥徐秉義、生。徐譜，秉義，字彥和，號果亭，官至內閣學士。

七年，甲戌，二十二歲。

正月，賊自鄖陽渡漢，連陷紫陽、平利。二月，陷夔州。六月，賊降復叛，陷所過州縣。七月，大清兵入上方堡。至宣府。十一月，賊自陝西分犯河南、江北、湖廣。徐譜。

巡按御史，祁君彪佳，表於貞孝之門。穆據行狀補。彪佳，字宏吉，浙江山陰人，明史有傳。

是年，甥徐元文、生。徐譜，元文，字公肅，號立齋，官至文華殿大學士。

八年，乙亥，二十三歲。

正月，賊陷鳳陽。六月，賊復走陝西。七月，賊復東犯。十一月，賊陷陝州，攻洛陽。徐譜。

六月，歲試，上虞倪提學元珙，置先生卷二等。元譜。

九年，丙子，二十四歲。

五月，賊復入陝。七月，大清兵入塞。八月，東歸。徐譜。

六月，科試，倪提學連任，置先生卷二等。元譜。

是年先生當應鄉試。日知錄載：是年應天鄉試，春秋題，宋公入曹，以曹伯陽歸。先生譏其以公孫疆比陳啓新，曹伯陽比思陵，非所宜言，大不敬。徐譜。

巡按御史王君一鶚，具題貞孝事，狀奏，旌其門，報可。元譜：謙案，貞孝受旌在九年，見先生康熙十八年，與史館諸公書縣志亦同。元譜列入十年說。

穆案：先生所作先妣行狀，貞孝請旌之歲，已齒文會，知名且十年。

十一年，戊寅，二十六歲。

九月，大清兵入塞。徐譜。

二月歲試，濰元提學煒置先生卷三等。十二月科試，元提學連任，仍置三等。元譜。

穆案：是年冬，蘇州府承天寺浚井，得宋鄭所南所藏心史鐵函，巡撫張國維刻其書，又爲所南立祠堂。

詳見先生所作井中心史歌序。閻潛邱曰：有偽書出，近代佐證分明，苟一言及輒譁然起，被以大不韙之名，且以甯可信其有者，莫過史彬之致身錄。鄭所南之心史，一爲史兆斗所撰，一爲姚士舜所撰，前說余徵諸

牧齋後說聞諸曹秋岳云。又與公肅甥書，憶昔時邸報，至崇禎十一年方有活版，自此以前，竝是寫本。

十二年，己卯，二十七歲。

正月，大清兵入濟南，德王由樞被執。二月，大清兵北歸。徐譜。

七月城固張提學鳳翽覆試科舉先生取遺才二等。元譜

先生撰肇域志始於是年見自序又郡國利病書序云崇禎己卯秋闈被擯退而讀書。徐譜

十三年庚辰二十八歲

九月張獻忠陷劍州。徐譜

四月邑中修葺文廟先生與葉秀才弈荃歸秀才莊重新兩廡木主而正其位次。元譜謙案崑新合志弈荃字元暉一字水修由諸生

入太學性剛直好義工詩古文詞師事劉宗周徐石麒陳龍正講求性命之學尤究心邑政利弊乙酉夏以父權杭州關遇國變藝星往省還至嘉善爲亂民所戕覓其尸不得以衣冠葬之莊字元恭爲諸生博涉羣書乙酉後亡命薙髮僧裝稱普明頭陀後乃廬金澹里先墓側生平最善顧炎武以博雅獨行相推許而俱不諧於俗有歸奇顧怪之目穆案先生書孔廟兩廡位次攷後歸生名莊更名許明工草隸爲東吳高士

十二月歲試張提學連任置先生卷

二等。元譜

先生答徐公肅書憶昔庚辰辛巳之間國步阽危方州瓦解而老成碩彥品節矯然下多折檻之陳上

有轉圜之聽思賈誼之言每聞於諭旨烹宏羊之論屢見於封章。徐譜

十四年辛巳二十九歲

正月李自成陷河南殺福王常洵遂犯汝州城陷知州錢祚徵不屈死張獻忠陷襄陽殺襄王翊銘十

一月李自成陷南陽殺唐王聿錡元是年大旱元

二月蠡源公卒先生居承重憂元譜穆案三朝紀事闕文序臣祖父某年五十一而始抱臣炎武為孫先妣行狀貞孝請旌之歲先王父年七十有四則蠡源公之卒也年七十九矣十月葬蠡

源公及元配周碩人繼配李碩人於司馬賜塋之穆位元將葬既祖奠火作於門里人救之得息徐譜按健庵作

舅母朱孺人壽序述此事云家難復作室廬失火被焚

十五年壬午三十歲

二月大清兵克松山下錦州五月張獻忠陷廬州九月李自成決河灌開封城陷十一月大清兵入薊

州連下畿南山東州縣徐

兄遐篆卒弟子叟生子洪善嗣遐篆後元譜記遐篆卒於順治十一年甲午穆案遐篆中式崇禎六年癸酉舉人健庵稱遐篆舉鄉試一上公車而卒歸元恭送先生北游序稱崇禎之末祖父蠡源先生

暨兄孝廉捐館健庵為顧氏甥元恭與先生總角至交皆不當有誤又崑新合志稱遐篆年未四十卒若卒於甲午則先生之年且四十有二矣推尋其故元譜蓋譌歲壬午為歲甲午耳今為刪正即以子叟生子洪善之年為遐篆遠逝之年與各書所言乃一一符合

也謙案洪善字達夫號柏亭康熙丙辰進士官中書年未四十卒

十六年癸未三十一歲。

正月李自成陷承天五月張獻忠陷武昌八月陷湖南諸郡十月李自成破潼關遂陷西安延安諸郡

徐譜

夏釋承重服循例入成均

元譜案例頁自萬曆間始

子叟生次子洪泰

元譜穆案健庵舅母朱孺人壽序教二子達夫來白皆有聲鄉校來白當即洪泰之字蓋亦諸生矣

先生譎觚序僕自三十以後讀經史輒有所筆記

徐譜

十七年甲申十月朔為大清順治元年三十二歲

正月張獻忠寇四川二月李自成陷太原遣別將犯畿南陷真定李自成陷寧武關三月陷京師

徐譜

九日明莊烈帝崩於宮中萬壽山巾帽局

元譜謙案陳濟生再生紀略謂在山之紅閣御元鑲邊白絛綢半臂紅閣蓋建以復內操者

四月二十九日李賊西

走五月三日王師入睿親王攝政

元譜恭案世祖章皇帝時甫七齡駐蹕盛京九月入關十月朔御極定鼎京師

是月初一日明鳳陽總督馬士英

等迎立嗣福王由崧於南都仍稱崇禎十七年以明年乙酉為宏光元年

元譜

四月先生率家人侍母遷居常熟之唐市

元譜謙案常昭合志唐市舊名尤涇在雙鳳鄉去縣東南三十里又東南則崑山界

十月歸千墩被劫十二月

復遷居常熟之語濂涇。

元譜謙案常昭合志語濂涇黃涇東北入尤涇。穆案先生撰先妣行狀兵入南京炎武孝母備居常熟之語濂涇介兩縣之間。又從叔父穆庵行狀語濂涇去千墩八十餘里。又憺園集兄孚若詩集序舅

氏亭林先生避兵常熟之窮村。兄往依之。朝夕討論。故詩日益工。又案望雲樓帖刻先生手札云。醉德無何。忽云改歲。兄今其脫然。慰乎。弟則馬學士所云。百憂熏心。三冬少暇。往日之舉。犯而不校。逆獸已無所用。其熱然。今乃黑夜令人縱火。焚佃屋一所。弟既蕩無一椽。僕輩亦曠烏靡集。夫行強雖武士之恆談。火攻則兵家之下策。況於臨池之畏。實爲扇煽之謀。包藏禍心。日甚一日。公宮之火。先告於寺人。陵門之戟。首誅乎元濟。燎原之惡。已盈自焚之禍。行及布諸左右。憑楮愴然。元恭仁兄足下。弟絳頓首。所云黑夜縱火。不知即指千墩被劫事否。時尙未更名炎武。則與葉方恆構釁一案無涉也。未得其實。附記於此。

崑山令楊君永言應南都詔。列薦先生名於行朝。詔用爲兵部

司務。元譜永言字岑立。昆明人。崇禎癸未進士。崑城破後。走陳墓。詞事彌月。知不可爲。復入黃浦。依吳帥吳敗。祝髮。珠涇萬壽庵中。釋名嬾雲。旋入中峯。後入金華。歸滇卒。勝朝殉節錄。稱其殉乙酉之難。追諡忠節。誤。

先生編年詩起是年。有大行哀詩一首。感事詩六首。

徐譜按感事詩云。日角儻符早。天枝主壘臨。安危宗社計。攢立大臣心。謂南都擁立福王之事。其年四月乙酉。魏國公徐

宏基等。迎福王於江浦。丁亥。百官迎見。王素服角帶。哭。五月庚寅。王行告天禮。升殿。徐宏基跪進監國之寶。王受訖。大赦。戊戌。羣臣勸進箋三上。王許之。壬寅。卽皇帝位。改元宏光。先生詩所謂告天傳玉冊。哭廟見諸侯。詔令屯雷動。恩波解澤流也。詩又云。上宰承王命。專征指大江。出關收漢卒。分陝寄周邦。又云。登壇推大將。國士定無雙。謂史可法以東閣大學士督師揚州。又云。聽律音非吉。焚旗火乍紅。自注云。六月壬午。督師標下兵與浙江兵鬪於鎮江西門外。焚民居數百家。標下兵者。先生聖安皇帝本紀所云。標下總兵官于永綬等兵也。

二年乙酉南都宏光元年三十三歲。

五月初九日王師渡江初十日夜宏光帝出走十五日王師入南都明亡。元譜

春膺楊永言之薦至京口四月偕從叔父穆庵赴南京。

元譜謙案崑新合志穆庵名蘭服字國馨紹芳從子以諸生入太學才名著一時明亡後棄儒業水歷稱號南中遺

使授冠帶辭疾不赴遁跡田野以醫濟人先生餘集有從叔父穆庵府君行狀

寓朝天宮因拜先兵部侍郎公祠

元譜謙案詩集誤編拜祠詩入辛卯年穆案此年拜祠事有金陵雜詩記得尙書卷一首足證辛卯

年再至金陵而再拜之何云誤也

拜祠畢即歸語濂涇八字穆廬補

是年貞孝年六十五月朔同邑歸莊嘉定吳其沆及從叔父

穆庵姊子徐履忱持觴登堂為母壽退而飲至夜半旦日別去

徐譜事見吳同初行狀穆案行狀貞孝誕辰為六月二十六日而稱觴乃在五月朔者蓋即生日

不受賀之義先生所終身秉承者也其沆字同初少先生七歲履忱字孚若先生伯姊之子生於崇禎二年時年十七與健庵為再從兄弟

將復詣闕未旬日而南都陷先生從軍至蘇州

元譜徐譜時大清兵已定江浙大軍駐金陵一軍駐蘇一軍駐杭一軍駐沿海吳松等處有明江南總兵吳志葵者吏部主事夏允彝門人也領兵海上又有十將官者屯兵陳湖中與湖旁諸生陸世綸等各有衆千餘閏六月十日明兵科給事中陳子龍舉人徐孚遠章簡聞南都不守起兵松江與陳湖兵合允彝又入志葵軍為之馳書檄聯絡士大夫華亭則總督兵部侍郎沈猶龍下江監軍道荆本撤中書舍人李待問嘉定則左通政司侯嗣曾進士黃淳耀總兵蔣若來崑山則鄒陽撫臺僉都御史王永祚編修朱天麟吳江則職方吳易總兵王蜚太倉則總兵張士儀宜興則行人盧象觀等互為聲援先生與楊永言吳其沆歸莊皆佐王永祚軍諸軍謀以松江兵攻杭嘉定太倉兵攻沿海宜興兵趨南京約伏艦江中獨吳志葵先進向蘇州捷音至剋日同發先生詩云千里吳封

大。三州震澤通戈矛連海外。文檄勸江東。卽赴吳時事也。志葵旣薄蘇州。參將魯之瑛以三百人先登。斬胥門而入。大清兵匿於學宮。俟其退擊之。殲焉旣而松江破。陳子龍走嘉定。陷侯峒曾死。先生遂歸。而崑山兵起。死者四萬人。吳其沆與焉。楊永言遁之蘭谿。惟先生與歸。六月。仍歸語濂涇。元譜按先生餘集有云。吳中諸縣並起義兵自守。而余以母在。獨屏居水鄉不出。自六月至於閏月。無夜不與陳君露坐水邊樹下。仰視月食。遙聞火燬云云。是崑邑守城事。先生一不與謀。故後得免莊得脫。

於難。

閏六月十五日崑山士民閉城拒守。

元譜先是五月初七日以後。居民聞王師已入南都。紛紛移遁四鄉。而張浦。葭葭。安亭諸村鎮。奸民乘機劫掠。縣令楊永言以二十二日盡放獄囚。至月杪。郡

中大吏及守令皆先期遁。六月初七日。豫親王方駐金陵。遣刑部侍郎李延齡。巡撫王國寶。統兵泄蘇。新郡守王鏞發安民榜。至崑。並取圖籍。永言棄印潛逃於泗橋。陳宏勳家水利縣丞閻茂才。偕邑紳耆老於初八日赴胥門納款。十二日院遣郡人周荃來崑。安撫十八日。以茂才知縣事。閏六月十一日。薙髮令下。十三日。茂才出示薙髮。且親持名刺謁縉紳。城中大譁。焚縣治。殺茂才。十五日。貢生陳大任等議推舊狼山總兵王佐才爲主帥。十七日。楊永言及陳宏勳等亦以所募兵數百人入城。永言遂爲監紀。仍知縣事。借城中紳士襄糧移檄。爲久守計。七月初二日。王師東下。越二日。十六日丙申。月食旣。星流竟夕。元譜見日知錄。星隕如雨注。而系以縣西眞義村兵出迎戰。敗績。初五日黎明。王師渡濠。

憶偶
謾耳。

明靖虜伯鄭鴻逵。戶部主事蘇觀生。奉唐王聿鍵如閩。黃道周。張冑堂等。奉聿鍵稱監國。六月丁未。卽位於福州。改元隆武。元譜魯王以海。亦稱監國於紹興。徐譜

七月初六日巳刻。王師下崑山城。元譜先生生母何太孺人。被游騎斫右臂折。弟子叟。子武並遭難。子叟

妻朱氏引刀自刺其喉，僵臥瓦礫中得免。

穆補。憺園集。舅母朱太孺人壽序。歲在乙酉。王師南下。衆議登陣守禦。紛紛。挈家避去。何夫人曰。老嫠婦必死於此。子叟子武兩舅與舅母俱不敢去。未幾。

城破。兩舅並遭難。舅母朱夫人知事急。引刀刺其喉。氣息纔屬。僵臥瓦礫中。死者纍纍。何夫人守婦尸不去。俄游騎過。斫何夫人右臂。損折久之。朱夫人得甦。起覓其姑。悲不自勝。手製舊襦爲姑裹。纏重傷。復自塞其頸。相抱匿廡下。破屋以免。越日扶掖登舟出城外。外

祖母常稱曰

孝婦孝婦云。越九日。王師復下常熟。貞孝於十四日聞變。即絕食。至三十日乃終。遺命先生勿更出仕。元譜。

穆案。先生種先妣行狀。七月乙卯。崑山陷。癸亥。常熟陷。吾母聞之。遂不食。絕粒者十有五日。至己卯晦。而吾母卒。八月庚辰朔。大斂。又明日而兵至矣。遺言曰。我雖婦人。身受國恩。與國俱亡。義也。汝無爲異國臣子。無負世世國恩。無忘先祖遺訓。則吾可以瞑於地下。

穆案元譜。九日作二日。以行狀乙卯至癸亥推之。知二字誤。十四日作二十四日。以行狀癸亥至己卯推之。知二字衍也。

唐王遙授先生兵部職方司主事。元譜。

九月。至嘉定。過吳其沆家。

徐譜。據初行狀。先生凡三過其居。戊子年。寄薛案詩云。只有延陵心。尙挂姑蘇樹。亦謂其沆

也。
十二月十九日。權厝貞孝柩於司馬塋東偏。元譜。

是年詩有京口卽事二首。

徐譜案。是年史可法駐揚州。高傑移屯瓜州。宏光命可法諭四鎮。厲兵秣馬。駐防河淮。剋期進師。可法檄諸鎮出兵。高傑首奉命渡泗水。所部王之綱前驅。薄睢陽。可法進次河上。先生京口

卽事詩云。白羽出揚州。黃旗下石頭。又云。大將臨江日。中原望捷時。皆是年正月事。

京闕篇一首。金陵雜詩四首。

徐譜。先生金陵雜詩云。重聞百五日。遙祭十三陵。謂是年三月癸巳。遙祭諸陵也。又正殿虛椒疑一

首蓋謂宏光自去年命選淑女至此年四月又選於元輝殿規諷之意深矣

千里一首

元譜各詩皆五月以前作

秋山二首表哀詩一首奉先妣棄葬詩一首是

年作軍制論形勢論田功論錢法論

三年丙戌三十四歲

三月唐王督師黃道周舉兵至徽州戰敗被執不屈死唐王將入贛州鄭芝龍使軍民遮留不得行乃

駐於延平十月明兩江總督丁魁楚廣西巡撫瞿式耜等立桂王於肇慶府以明年爲永歷元年徐譜十

一月王師下建寧延平等府唐王走汀州執而殺之元譜明大學士蘇觀生又立唐王弟聿錫於廣州改

元紹武十二月王師入廣州殺聿錫徐譜

五月先生祖庶母黃氏卒十月十二日命家人趙和等遷居元譜未詳遷居何地將往閩中赴職方之召以母

喪未葬不果行元譜

是年詩有延平使至一首海上四首不去三首穆案池北偶談有論落日江頭送伍員員字用韻有據一條老鶴萬里心一首

作吳同初行狀

四年丁亥三十五歲

秋至海上。十月十日命家人趙和迎祖庶母黃氏柩葬於司馬公域外之西偏。

元譜。穆案先生答王山史書先祖有二妾炎武所

速事其亡也。

葬之域外。二十日亥時葬貞孝王太安人於賜塋東仲逢府君之兆。

元譜案少司馬葬時用歲丁亥月辛亥日丁亥時辛亥貞孝之葬干支悉同。

十一日具弔奠禮。

十二月二十一日移家語濂涇先生廬墓。

元譜

送歸莊往吳興。

徐譜元恭時赴吳興兄弟德清教諭繼登骨

哀執友松江陳太僕子龍同邑顧推官咸正吳縣楊主事廷樞及推官二子天遶天達先後死難各以

詩弔之。

元譜子龍字臥子齊浦人崇禎丁丑進士兵科給事中受魯王部院職銜與松江提督吳勝兆通謀是年夏勝兆反事泄逮子龍并逮藏匿子龍之嘉定侯岐曾於同邑顧天遶天達子龍乘間赴水死岐曾等同被殺於松江咸正字端木天啟甲子

舉人咸安府推官丙戌四月自關中歸知弟錢塘令咸建舉人咸受先已殉節聞唐王立於閩草密疏附寄舟山黃斌卿屬其轉達為邏卒所獲以告提督吳勝兆勝兆祕之及是年六月勝兆反密疏遂發逮至金陵為洪承疇所殺後二子之死僅一月廷樞字維斗崇禎庚午南京解元福王時薦授兵部主事兼監察御史馬阮當國抑不能用罷歸至是年四月遁居山陰當事搜索得之絕食五日不死作絕命詞十二首裂衣帛血書之終以不屈被殺於蘆墟村中。

是年詩有贈顧推官一首。

徐譜案張秉貞之挾潞王出降顧咸建棄官去追及之於吳江閏六月朔殺之詩中臬卿血云云蓋述此事又先生之從軍於吳咸正必同行故有句吳古下國難與秦風齊之句其後哭咸

正詩曰及乎上郡還始結同盟契崎嶇戎馬間周旋止一歲所謂崎嶇周旋者即指從軍耳。

大漢行 義士行 秦皇行 各一首 墟里一首 塞下曲二首 海上行

一首。徐譜詩云大海天之東其處有黃金之宮上界帝子居其中又云或言有巨魚身如十洲長幾化為龍不可當一旦失水愁旁皇蓋謂魯王之入海徒以海水為金湯舟楫為宮殿終於淪亡也又云但見鯨魚出沒擊齒磨牙先生知鄭芝龍之負胤

襄國其子成功。始則附閩。繼則附粵。終不爲魯王用。而舟山非可以圖存。故又云。東浮大海難復難。不如歸去持漁竿。以明決不宜往之意。神道表。以爲幾豫吳勝兆之禍。欲赴海上。道梗不前者。似未知先生之意也。穆案。據元譜。則先生實曾至海上。謝山云。道梗不前。仍非實錄。但詩編於塞下曲。後塞下曲云。卽今三月鶯花滿。此詩當作于春。未夏初時。尙未赴海上耳。明年戊子。將遠行詩云。去秋闕東溟。尤實至海上之顯證。

哭楊主事一首。推官二子被執

一首。淄川行一首。

元譜。爲孫之獬作也。之獬。淄川人。天啟壬戌進士。媚奄得官侍講。名在逆案中。入國朝爲禮部侍郎。順治二年六月。升兵部尙書。總督軍務。招撫江西。後乞歸里中。是年九月。土賊丁可澤。句引叛賊謝遷等。陷淄

川擒之。獬支解死。結云。取汝一頭謝元元。當由之獬嬰衆怒耳。

哭顧推官一首。

徐譜。成正至江寧。總督洪承疇問曰。汝知史可法在平不在乎。成正答曰。汝知洪承疇死乎不死乎。洪默然。遂殺之。詩云。檻車赴白門。忠孝詞色厲。竟作

戎首論。卒踐捐生誓。謂此也。

哭陳太僕一首。奉先妣葬於侍郎公墓左一首。墓後結廬三楹一首。精衛一首。吳興行

一首。

作王時沐墓志。

五年。戊子。三十六歲。

秋。至湖上。

元譜。徐譜案。將遠行詩云。去秋闕東溟。今年泛五湖。偶來詩云。偶來湖上已三秋。蓋自秋迄冬。泛五湖也。

冬。抵京口。

是年。語濂涇。家中又被劫。

元譜。

是年詩。有越鳥巢南枝一首。江介多悲風一首。擬唐人五言八詔六首。

穆案。六詩皆非泛擬。乞師悲往事也。擊筑投筆明素志也。渡瀘聞難。以不

忘恢復望諸公也。歸里則知時之不可為而倦飛。常熟縣耿侯水利書一首。元譜。謙案。常昭合志。耿橋。字蘭錫。獻縣進士。萬曆三十二年。以調繁至。講求水利。東浚橫。

浦。橫溪。李墓。鹽鐵塘。北浚。福山塘。西浚。奚浦。三丈浦。凡土田高低。宜蓄宜泄。尺寸不遺。而其開浚之法。區畫周至。約束嚴明。具載所著水利全書。其立說以水利用湖不用江。尤不易之論。穆案。耿侯水利書。郡國利病書。采之頗備。偶來一首。

浣溪碑歌一首。薛開封案一首。元譜。謙案。略見人心錄。薛名案。亂後歸釋。謂去冠。故去山。去髮。故去人。因姓米氏。自號米堆山。將遠行一首。京口一首。

六年己丑三十七歲。

春登靈巖山。清明封墓樹。秋至吳江過八尺。納妾韓氏。元譜。

是年詩有石射棚山一首。先生自注。吳郡志。靈巖山在城西三十里。一名石射棚山。春半一首。元譜中有云。洪州七月。圖。糧盡力亦殫。指江西金擊。恒事。聲桓。以去年戊子七月。據南昌叛。是年正月。為

官兵所破。聲桓中二矢。懷人一首。秋鷹一首。八尺一首。穆案。元譜有至吳江過八尺一節。然此八尺。孤帆一葉。舟云云。八尺二字。似非地名。所未詳也。桃花溪歌。贈

陳處士梅一首。穆案。梅字鼎和。餘集有常熟陳君墓志。瞿公子元銷將往桂林不得達而歸一首。元譜。元銷。常熟人。父式。紹。為廣西巡撫。南都陷。與丁魁楚等立永明。

王由榔於梧州。式紹。為文淵閣大學士。甯守桂林。王師破桂林。與總督張同敵。俱被離。

七年庚寅三十八歲。

正月五日韓氏生子林元名之曰詒穀

元譜諫案崑山張元寶著厄言謂先生無子蓋天奄也殊誕

時怨家有欲傾陷之者乃變衣冠

偽作商賈游金壇登顧龍山

元譜山在縣南五里

再至鎮江登北固樓已復往嘉興

是年詩有顧龍山高皇帝題詞一首

元譜元末丁酉十一月明太祖駐蹕此山題詞云望東南隱隱神壇獨跨征車信步登山煙寺迂迂雲林鬱鬱風竹珊珊塵不染浮生九寰客中有僧舍三間他日

偷閒花鳥娛情山水相關

重至京口一首榜人曲二首流轉一首秀州一首

徐譜案流轉詩云云蓋先生自乙酉以後展轉江浙之境於今五年至此乃欲北至中原故鈔

書自序云炎武之游四方十有八年亦以此年為始也穆案秀州詩云將從馬伏波田牧邊郡北蓋至此而北游之志決矣

八年辛卯三十九歲

至金陵初謁孝陵

元譜

拜侍郎公祠

穆案此句元譜本有車君刪去非也辯見乙酉下

八月十四日至淮安與山陽王起田略徐州

萬年少壽祺定交

元譜文集有王起田墓志壽祺字年少崇禎庚午舉人工詩文書畫又工寫美人他若琴棋刀劍百工技藝細而女紅刺繡粗而革工縫紉無不通曉風流豪宕傾動一時滄桑後罷公車僧冠僧服自名明志道人沙

門慧壽痛飲肉如故邵徐之亂移家公路浦著有隰西堂集

抵清江浦

元譜

是年詩有恭謁孝陵一首

穆案郡國利病書孝陵在南都外城內鍾山之陽懿文陵附於其側

拜先曾王父木主於朝天宮後祠中一首贈萬

舉人壽祺一首 淮東一首

元譜爲劉澤清作也。澤清爲福王時四鎮之一。開府淮東。頗事聲色。順治二年五月。福王出走。七月。澤清率所部納降。又三年。戊子。陰與曹縣叛。寇通許。以內應。遂作亂。陷曹縣。十月。英親王

討平之。詰其由。知出澤清。乃族誅之。詩中云。地下逢黃侯。謂靖國

公黃得功也。得功先於乙酉六月。王師據江口時。迎戰中流。矢死。贈人一首。

九年壬辰四十歲

入郡城。奠姊壻陳皇士之父。文莊公祠。

元譜文莊名仁錫。字明癩。號芝臺。天啟壬戌探花。南京國子監祭酒。福王時。贈詹

庶歷官至太僕寺丞。穆案。靜志居詩話。皇士經亂歸田。緝畝。積兩朝遺詩。又命工傳寫。明三百年來忠臣義士像。裝以爲冊。可稱好事矣。

至吳縣之橫山。展拜遠祖黃門公墓。

元譜墓在橫山。東越來溪上。盧

襄石湖志云。墓上有一巨石。橫臥可二丈許。石上古松如蓋。湖上望見之。卽知爲野王墓也。先生時尙如故。

遇路舍人澤溥於虎邱。

元譜舍人時攜家奉母。寄居湖上。徐譜按先生去歲贈萬壽祺詩云。會待淮水平。清秋發吳

榜。又贈人詩云。路旁多行人。一南一以北。南北遂分手。去去焉所極。蓋所送之人北行。而先生仍南歸吳。故拜黃門墓。而路澤溥詩亦云。相逢金閨西也。穆案先生有送書小帖云。路安卿名澤溥。曲周人。故總督皓月公之長子。又廣師篇云。險阻備嘗。與時屈伸。吾不

如路安卿注。互見詩下。

自唐市仍返千墩。

至清江浦。渡河。抵王家營。

是年六月。弟子嚴。得子洪慎。

元譜作十九日。謙案。崑新合志。洪慎

字汝嘉。試成均。得州倅。以親老亂歸。從父炎武卒於晉。走三千里。扶輦葬祖塋。承遺命。以子宏佐爲炎武。瘞子詒穀。後性愛客。就所居西偏。疏泉壘石。與故人嘯詠。以終穆案。據衍生元譜。先生卒於曲沃。從弟嚴自崑山來。偕衍生扶柩歸。不云洪慎也。衍生又云。以遺書

致之。立齋兩表。兄及汝嘉。兄則洪慎。時在都中。未嘗至晉。甚明。當是志誤。

從叔父穆庵。得子巖。

元譜崑新合志。巖字大雲。好學工詩。少游太學。嘗作落花詩百首。傳誦盡下。

先生有世僕陸恩

叛。投里豪葉方恆。

元譜。方恆。字朔初。崇禎壬午舉人。順治戊戌進士。官至山東濟寧道僉事。穆案。順治戊戌進士。履歷便覽。葉方恆。字敬默。父重華。戊辰進士。太常少卿。望雲樓刻歸元恭與葉朔初手札。陸恩作陸欽。後刻集。仍改作

恩。陸

案鈔書自序。年四十。斐然欲有所作。徐譜。

是年詩。有同族兄存愉。拜黃門公墓一首。贈路舍人澤溥一首。

元譜。澤溥。父振飛。字見白。天啟乙丑進士。涇陽知縣。崇禎中。屢遷至僉都御史。總督漕運。巡撫

淮揚。北都陷。福王立於南京。河南副使呂弼周。爲闖賊節度使。來代振飛。癸未進士。涇陽武棟。爲賊防禦使。招撫徐沛。振飛擊擒二人。竿弼周於法場。命軍士人射三矢。乃解磔之。縛棟徇諸市。鞭八十。檻車獻諸南朝。伏誅。故詩中云。桎梏獻行朝。逆黨皆戰慄。又云。天子呼恩官。干戈對王使者。唐王聿鍵。曾以罪錮守陵中。官虐之。振飛上疏。槩寬罪宗。得釋。乙酉南京破。聿鍵自立於福州。趣召振飛。制書有朕有守困恩官。路振飛云云。既至。拜太子太保。吏部尙書。兼文淵閣大學士。官一子職方員外郎。又錄守淮功。廢錦衣世千戶。順治三年。王師攻克仙霞關。聿鍵走汀州。振飛追赴不及。汀州破。走居海島。明年將赴永明王。乃以悲憤成疾。而卒。粵中賜諡文貞。

清江浦二首。丈夫一首。王家營一首。傳聞

三首。元譜。是歲永明王在肇慶。李定國攻陷廣西。王遣使召定國入衛。蓋王爲其下孫可望所制。間關奔竄故也。

爲常熟楊子彝作祠堂記。

元譜。謙案。汪翊。楊順兩先生傳云。萬曆之季。士之爲文者。喜倡新說。時遠傳注。彝與太倉顧夢麟。力明先儒之說。天下翕然從風。稱楊顧學。以歲貢爲松江訓導。作與人材甚廣。居五載。擢知

都昌縣。以道阻弗克赴任。明亡。遂不出。晚歲目盲。猶令人讀書其側。爲諸生講說無少倦。年七十九卒。

十年癸巳年四十一歲。

三月魯王去監國號。不知所終。徐譜。

春至金陵。二月再謁孝陵。並謁太祖御容於靈谷寺。

元譜謙案。靈谷寺。梁天監十三年。爲寶誌公建塔於鍾山玩珠峯。前名開善精舍。後爲開善寺。宋改名太平興國寺。後名蔣山寺。明

初改寺於舊基之東五里。而舊基遂爲孝陵。太祖帝后御容。今攝山優曇庵中亦有摹本。不知卽孝陵中藏本否。

十月三謁孝陵。并作圖。

詒穀殤。更納戴氏。

元譜謙案。歸元恭集。戲贈先生

納姬詩云。同心初縮在秦淮。孤寄清江音問乖。雖異九秋媿好怨。已知一月太常齋。占熊從此歡無既。弋鴈何妨老自偕。不待王郎去迎接。西風今送入君懷。自注謂甯人於金陵納姬。置之清江浦。至是姬得南歸云云。今則不辨所納何氏。以時事案之。或是戴也。

松案。先生去年自王家營仍歸洞庭山。是年有路舍人家詩。路居於洞庭東山也。由洞庭山至江寧。復

自江寧歸吳。贈楊永言詩序云。今復來吳下。感舊有贈。又贈郝將軍詩序云。今爲醫於吳之上津橋。言

及舊事感而有贈。贈劉教諭詩亦云。栖遲十載五湖湄。皆在吳之蹟也。

徐譜。穆案。此段可補元譜。二月後至九月之闕。

是年詩。有路舍人家。見東武四先歷一首。

元譜。舍人父文貞公。在闕時。特請製新歷。

再謁孝陵一首。恭謁高皇帝御容一首。贈

朱監紀四輔一首。監紀示游粵詩一首。贈鄔處士繼思一首。

徐譜。先生此數年中。往來無定。而金陵。揚州市井。皆歷至。故贈鄔繼思詩云。年年尋杜甫。一過浣花。

溪。鄔寶藥揚州市先生類過之。

昔有一首。楊明府永言復來吳下一首。送歸高士之淮上一首。贈劉教諭永錫一首。

元譜案永

錫。字欽爾。號贖庵。魏縣人。崇禎丙子舉人。癸未謁選長洲教諭。邑令遂寧李寶廉知其貧。欲煩以吏事。謝不應。已署上海令事。與妻子日食蔬粥。居三月。還長洲。乙酉之變。率妻栗氏及童僕二十餘人。隱居相城。大吏遣人說之。永錫拔劍欲自裁。乃止。謂其妻曰。彼再至。我與若立自決矣。皆裂尺帛握之。會海上兵起。乃罷。永錫有女。許字未嫁。亂後。恐詒父母憂。絕粒而死。其母哭之成疾。亦死。後大水乏食。家童相繼死。埋骨道旁。永錫遣子臨與婦歸。魏臨既歸。思父不置。假貸得百金。欲馳以獻父。星夜南下。馬驚墮地。被傷死。初永錫長八九尺。容貌甚偉。至是毀形骨立。見者哀之。久之成疾。漸劇。一夕大呼。烈皇帝者。三遂卒。時甲午秋也。同時有齊丈人者。撫其喪。葬於閭門外半塘。以妻女殉之。穆案。靜志居詩話。永錫有洹水遺詩。又曰。洹水。至性之士。兵後隱居相城。有大吏強之仕。袒褐疾視曰。我中原男子。年二十渡漳河。登大徑。躍馬鳴鞘。兩河豪傑。誰不知我。欲見辱邪。取壁上所挂劍。欲自剄。門下士抱持之得解。既而女妻相繼餓死。子爲盜所傷亦死。久之。洹水歿。其弟子徐晟。陳三島等。經紀其喪。葬之虎邱山塘。

贈郝將軍太極一首。孝陵圖一首。十廟一首。

元譜謙案。洪武二年。立十廟於雞鳴山。又增功臣廟。祀徐達以下二十一人爲十一。後又增四廟。今已半就圯廢。

顧亭林先生年譜卷二

十一年甲午四十二歲

春至金陵卜居神烈山下

元譜穆案神道表先生僑居神烈山下徧游沿江一帶以觀舊都畿輔之勝

由儀真歷太平登采石磯東抵蕪湖秋游

燕子磯留宿僧院至冬始還

元譜

是年長甥乾學以選貢入成均

穆據懣圖集補

弟三甥元文鄉試中式舉人

元譜

先生此數年未歸崑山觀松江別友人詩言十載違鄉縣三年旅舊都可知矣

徐譜

是年詩有金山一首僑居神烈山下一首古隱士二首真州一首太平一首蟻磯一首

元譜磯在蕪湖

江上

一首久留燕子磯院中一首

徐譜詩云寄食清江院從秋又涉冬蓋冬盡又歸神烈僑居故明年元旦得在陵下

范文正公祠一首錢生肅潤之父出

示所輯方書一首

元譜肅潤字楚日無錫人著有南忠錄諸書

十二年乙未四十三歲

二月初五日午刻江南地震六月初八日地又震元譜

元旦四謁孝陵穆補

春自金陵還崑山

五月十三日擒叛奴陸恩數其罪沈諸水叛黨復投葉氏訟

之官移獄松江

元譜先生贈路光祿詩序云先是有僕陸恩服事余家三世矣見門祚日微叛而投里豪余持之急乃欲陷余重案余聞亟擒之數其罪沈諸水其壻復投豪訟之郡行千金求殺余余既待訊法當囚繫乃不之獄曹而繫諸

豪奴之家同人不平爲代愬之兵備使者移獄松江府以殺奴論豪計不行而余有戒心乃浩然有山東之行矣神道表獄日急有爲先生求救於某公者某欲先生自稱門下而後許之其人知先生必不可而懼失某公之援也乃自書一刺與之先生聞之急索刺還不得列揭於通衢以自白某公亦笑曰甯人之下也曲周路舍人識兵備使者乃爲愬之始得移訊松江而事解穆案爲先生求救者歸高士元恭某公者謂錢謙益也謙案歸元恭集與葉帽初書弟到郡時知甯人兄嘗於事勢將有不測輿論亦多以兄爲已甚故弟語稍激切然論其究竟愛甯人亦所以愛兄也已而崑老輩委曲相勸兄亦動惻隱之心要於兄之自爲計亦大便而弟輩則羣而誦兄之高義昨在西郊文初子佩諸君及二三遠方友人間及弟公言於衆曰此事誤在顧而葉能不終訟可謂仁人君子人皆服兄爲有量及歸寓忽聞有變局爲之大驚兄嘗謂甯人城府深密機械滿腹兄前已諾和議而忽出最難之題目迫之以必不能從之事是名雖曰和實欲戰也兄豈亦有城府機械邪崑老極和平之人亦以兄爲太甚今將去矣弟亦即日同國馨去矣但思兄若不肯就和卽和而必欲云云甯人計無復之必自經溝瀆無疑也陸恩人奴也尙不可殺而迫其主以取償甯人非尋常無聞之人又事無死法而一旦迫之致死於兄便乎不便乎甯人無親子弟料死後必無與申冤者卽有兄自當有以待之固知殺甯人萬萬無害獨不畏清議乎甯人腹笥之富文筆之妙非第一人之私言卽灌老諸公皆擊節稱賞四方之士見其詩古文者往往咨嗟愛慕兄能殺甯人之身能并其生平之著述而滅之乎使天下後世讀其詩古文者以爲如此文人而殺之者乃葉帽初也此名美乎不美乎自古

文人之受禍者。如子蘭殺屈原。姚賈殺韓非。後世讀離騷及三公子之書。無不唾罵子蘭。姚賈。陳同甫爲小人。搆陷入獄。每讀其傳。爲之髮指眦睨。以兄平日自待之高明。何苦而爲此事邪。想兄之意。以爲甯人卽死於牢獄。死於桎梏。不得謂囑初殺之。吾誰欺。當世士大夫有口。亦可畏也。凡此之言。皆所謂愛甯人。卽以愛兄也。云云。核其語意。松江之獄。所由來歟。徐譜先生乙未年答原一公。蕭兩甥書云。奴隸鴟張親朋瀾倒。或有聞死灰之語。流涕而書韓安覽窮鳥之文。撫心而明趙壹。終憑公論。得脫危機。謂此事也。

是年詩。有元旦陵下作一首。歸生晟。陳生芳績書來答之一首。贈路光祿太平一首。

穆案。錢飲光明末野史。永歷紀事上。

規模闊大。好仿佛漢光武。平時恩舊。皆以南陽故人目之。如路振飛。遠隔三吳。募能召至者。賞銀五百兩。給以六品京秩。振飛至。取日拜相。官其子太平爲卿。又案。餘集王國翰墓志。稱太平嘗奉桂王命。徵兵於外。至樂昌。國翰往依之。

訓王生

仍一首。永夜一首。訓陳生芳績一首。

穆案。芳績。字亮工。常熟人。處士鼎和之子。先生避難語濂涇時。與鼎和比鄰。亮工時猶少也。著有歷代地理沿革表四十七卷。道光十三年。其鄉人張觀察大鏞爲

刊行之。贈路舍人一首。錢行人邦寅一首。

十三年丙申。四十四歲。

春。獄解。回崑山。三月。本生母何太孺人卒。閏五月。至鍾山舊居。獄解後。葉氏憾不釋。遣刺客偵所

往。至是。追及於金陵太平門外。擊之。傷首。遇救得免。

是月初十日。五謁孝陵。冬。在鍾山度歲。

元譜。

是年詩有松江別張處士慤王處士煒諸友人一首贈潘節士檀章一首檀章字力田吳江人稼堂之兄恭謁孝陵一

首王處士自松江來拜陵畢遂往蕪湖一首穆案處士卽下同游柵洪橋之王漢乙卯年閏五月十日詩有云更憶王符老飄零恨不同自注王徵君漢昔日同詣孝陵行香今年七十七

桃葉歌一首黃侍中祠一首先生自注在南京三山門外柵洪橋謙案柵洪橋祠今已無迹可尋城中金陵閣之祠蓋續建也王徵君漢具舟城西同楚二

沙門小坐柵洪橋下一首謙案漢字元倬上元人父之藩慷慨好義演能色養崇禎丙子舉於鄉先是戶部郎中倪篤之薦於朝以賢良徵不就念世亂親老賦南陔詩以見志著有南陔集見江寧府志及上元縣志

穆案明詩綜引顧甯人論元倬詩云先生詩深以婉和而學不失三百篇溫柔醇厚之旨攝山一首賈倉部必選說易一首穆案江寧府志儒林賈必選字徒南上元人萬曆己酉舉人官戶部主事

樂西新倉時巨璫總理兩部復遣其黨分伺六倉必選盡黜陋規無所染璫爲稍斂會同官倪篤之以屯豆下獄必選知其冤據事陳辨謫九江幕俄遷桂林司理升南工部虞衡司未任丁父艱歸卽杜門不出以講學著書爲事卒年八十七著松蔭堂學易

行世旅中一首謝王處士九日見懷一首送張山人應鼎還江陰一首穆案道光二十年新修江陰縣志藝文門采先生此詩而應鼎之名字翳如然則山

人信能卉布荷衣鴻冥塵外者矣和陳生芳績追痛兩尊人之作二首

作方月斯詩序謙案月斯佚其名穀城人明輔臣岳貢之子甲申後賣卜吳門夏節愨完淳集有贈方穀城遺孤流落郡中詩先生序謂與方子訂交自單闕之歲今且六年矣余客鍾山而方子亦僑居雲間不數數見頃冬春之際

余以仇家之訟，至雲間逆旅中，困不自聊，而方子時時相過慰藉，與余周旋兩月，因出其詩草示余，讀之云云，以時事攷之，當在是歲無疑。

十四年丁酉四十五歲。

元旦六謁孝陵。

徐譜案：元日詩云：晨興自江上，踰嶺走鍾山。又云：流轉雖不居，咫尺猶天顏。蓋先生是時雖寓金陵，而非神烈山之居矣。

春自金陵仍返崑山，避讎將北游，同人

人餞之，歸元恭爲文以贈其行。

元譜序曰：余與甯人之交，二十五年矣。其他同學相與，或二十年，或十餘年，蓋未嘗有經歲之別也。今於甯人之北行也，而不能無感慨焉。甯人故世家，崇禎之末，祖父蠡源先生，暨兄

孝廉捐館，一時喪荒，賦徭蠲集，以遺田八百畝，典葉公子券價，僱當田之半，仍斬不與。閱二載，甯人請求，無慮百次，乃少畀之。至十六而逢國變，公子者，素倚其父與伯父之勢，陵奪里中，其產逼鄰甯人，見顧氏世衰，本蓄意吞之，而甯人自母亡後，絕迹居山中，不出。同人不平，代爲之請，公子意弗善也。適甯人之僕陸恩得罪於主，公子鉤致之，令誣甯人不軌，將與大獄，以除顧氏。事泄，甯人率親友掩其僕，執而箠之死，其同謀者懼，奔告公子，公子挺身出，與甯人訟，執甯人，囚諸奴家，脅令自裁，同人走叩憲副，行提始出甯人，比刑官以獄上，甯人殺無罪奴，擬城旦，憲副與公子年家，然心知是獄冤，又知郡之官吏上下大小，無非公子人者，乃移獄雲間守，坐甯人殺有罪奴，擬杖而已。公子忿怒，遣刺客戕甯人，甯人走金陵，刺客及之太平門外，擊之傷首墜，驢會救得免，而叛奴之黨受公子指，糾數十人乘閒劫甯人家，盡其歷世之傳，以去。甯人度與公子訟，力不勝，則浩然有遠行，而同人之知甯人者，攜尊榼送之，酒半作而言曰：甯人之出也，其將爲伍員之奔吳乎？范雎之入秦乎？吾輩所以望甯人者，不在此。夫宣尼大聖，猶且遭難畏匡，文王之仁，不殄厥愾，寧人之學有本，而樹立有素，使窮年讀書山中，誰復知甯人者？今且登涉名山大川，歷聘六國，以廣其志，而大其聲，施焉？知今日困厄，非甯人行道於天下之發軔乎？若曰：怨仇是尋，非賢人之志，別離是念，非良友之情，於是同人咸曰：善。請歌以壯其行，而歸予爲之序。

至萊州，與掖趙汝彥士完、任子良、唐臣定交。

元譜：士完，字汝彥，崇禎壬午舉人，遭亂後，棄家而南，羈栖廢寺，弟士冕，官鎮江太守，物色得之，強之歸。士完故萊之巨族，從兄士喆入復社，有名，同

懷兄士元、士亮、士寬、弟士冕，並以才稱。唐臣，字子良，貢生，弟虞臣，亦以學聞著。

從唐臣假吳才老韻譜，讀而校之。過卽墨，游勞山。由青州至濟南。

與徐東癡、夜、張稷若、爾岐、定交。

元譜：東癡，初名元善，字長公，慕嵇叔夜之為人，更名夜，字東癡，號嵇庵，濟南新城人，束髮能詩，年二十九，遭難母死，遂棄諸生，南游江浙，西游宛鄆，歸遂不出，舉博學鴻詞，以老病辭，爲

文章原本經史，王漁洋嘗索其稿，但遜謝而已。後往江西，渡潯陽，稿盡沒於水。漁洋爲據拾遺詩二百餘首，付之梓。稷若，名爾岐，號蒿庵，濟陽諸生，先生與汪鈍庵書云：張君稷若所作儀禮鄭注句讀一書，根本先儒，立言簡當，使朱子見之，當不僅謝監獄之稱許也。又與鈍庵論師道書云：獨精三禮，卓然經師，吾不知張稷若，日知錄於喪禮，停喪二條，內備載稷若之說。穆案：稷若生於萬曆四十年壬子，長先生一歲，稷若歿，先生以詩哭之云：歷山東望正悽然，忽報先生赴九泉，寄去一書懸劍後，貽來什襲絕章前，衙門月冷巢窩室，墓道風枯宿草田，從此山東問三禮，康成家法竟誰傳。此詩亭林集不錄，附見蒿庵集末。

是年詩有元旦一首、萊州一首、安平君祠一首、不其山一首、勞山歌一首。徐譜案：詩云春日會鼓擊，逢逢則游勞山，猶在春時。張饒

州、允掄、山中彈琴一首。穆案：進士履歷便覽：允掄，字慈叔，萊陽人，崇禎甲戌進士，戶部主事。丙子升員外，丁丑升郎中，戊寅升饒州知府。徐譜：此詩亦作於游勞山時也。淮北大雨一首、濟

南一首、秋柳一首、誚徐處士元善一首。徐譜：夜亦有九日得顧甯人書約游黃山詩云：故國千年恨，他鄉九日心。山陵餘涕淚，風雨罷登臨。又以書勸先生爲昌平承天之行，則先生後此之謁天壽

山處士啓之也。

作汝州知州錢君行狀。元譜。公子大受。字伯衡。歲貢生。官博興訓導。以詩名。

勞山圖志序。穆案。池北偶談。引先生勞山說注曰。顧近寄所著日知錄。內辯勞山三則。又與前說不同。儀禮鄭注句讀序。齊四王家記。

十五年戊戌四十六歲。

春至泰安登泰山。元譜。穆案。金石文字記。岱岳觀造像下曰。碑下爲積土所壅。予來游數四。最後募人發地二尺下而觀之。乃得其全文。又宋董元康題名下云。右小石刻。在岱岳觀。余既錄唐碑。往還數四。道士謂予曰。昨發地得二石。請

觀之云云。據元譜。先生凡至泰安者三。記中云云。未得其年。謹志於初游。旋赴兗州至曲阜。謁孔林。往鄒縣。謁周公廟。孟廟。過鄒平。游張氏萬斛園。

元譜。故明兵部尙書張延登所居。與邑人馬宛斯。驢訪碑郊外。穆補。金石文字記。鄒平縣南五里。有景相公墓。景氏之裔。自洪武間有兩舉人。今亦尚有諸生。不能記其祖矣。予至其邑。有諸生二人來。稱景氏之孫。

請問其祖爲誰。予取通鑒及五代史。周世宗紀示之。乃謝而去。閒一日往郊外。視其墓碑。雖剝落者十之一二。而其曰。故中書侍郎平章事景公諱範。字甚明白云云。又譙觚云。此僕在鄒平與邑人宛斯馬君名驢。親訪其碑而錄之者。池北偶談。馬驢字驢御。一字宛斯。順治己亥進士。仕爲淮安府推官。終靈璧令。生而清羸。博雅書古。尤精春秋左氏學。著釋史一百六十篇。篇爲一卷。始開闢原始迄今。令人表其書最爲精博。時人稱爲馬三代。崑山顧亭林尤服之。

抵章邱。訪張隱君元明。元譜。隱君名光啟。世居章邱白雲湖上。少爲名諸生。崇禎庚辰年四十。遂棄舉子業。闢一園曰省園。以種樹藝花自樂。亂後足不履城市。年八十餘卒。有張仲集詩若干篇。漁洋爲刪存百餘篇傳之。至長山。主劉隱君果庵家。元譜。隱君名孔懷。號果庵。長山人。精於考覈。先生主其家。與之辯析疑義。

所著有四書字徵。詩經辯韻。五經字徵。范文正公流寓長山攷諸書。復至濟南。元譜。訪徐東癡。穆補案。東癡有顧甯人見過草堂。得張元明手書詩云。江南有客來。

顧亭林先生年譜

荒陵手持一緘兼致辭我聞整衣拜且展中有故人書及詩云云以元譜校之必此年事也

再赴萊州之濰縣 入都至薊州歷遵化玉田抵永平登孤竹山

謁夷齊廟 是年先生從子熊登武科進士

元譜謙案崑新合志熊字非熊又字爾策性耽文史不樂仕進嘗輯其先世自上海遷崑宗譜簡嚴有體為從父炎武所稱

是年詩有登岱一首謁夫子廟一首七十二弟子一首謁周公廟一首謁孟子廟一首萬斛園小集

一首仙隱祠二首濟南一首自笑一首訓非溪草堂聯句見懷一首濰縣一首衡王府一首督亢一

首京師一首薊州一首玉田道中一首永平一首謁夷齊廟一首

十六年己亥四十七歲

出山海關返至永平之昌黎著營平二州史事六卷

元譜先生在永平適永平府志成求先生作序因著此書作序應之

至昌平州初謁天壽

山

元譜 穆案昌平山水記天壽山在州北一十八里永樂五年七月皇后徐氏崩上命禮部尙書趙弘等往擇地得吉壤於昌平縣東黃土山及車駕臨視封其山為天壽山以七年五月己卯作長陵自是列聖因之皆兆於長陵之左右而同為一城焉

出居庸關仍返山東 抵鄒平訂其縣志

元譜

穆據鄒平縣志補 施尙白縣志序是時比部張奉之請告家居藏書多善本博采勤蒐進士馬宛斯討核詳實而吳門顧甯人自上谷來悉授以校之書遂

成凡八卷順治歲次己亥九月督學使者施閔章字尙白宣城人號愚山

晚號矩齋順治己丑進士由江西參議召試鴻博授侍講奉之名萬選

逕長清訪碑靈巖山寺

穆補 金石文字記靈巖寺宋李迪詩下云右小石

刻在長清縣靈巖山寺中其山距府九十里自前代稱為勝境宋金元人題字最多余至則當兵火之後從橫僱陪委之荆棘瓦礫之中然猶得唐一宋金元合四十餘以後不能悉數

南歸次揚州旋復北上至天津

度歲。徐謔案秋雨詩云秋雨合淮泗一望無高深顧與治詩序云余行三歲乃歸揚州而與治卒又與江南諸子別詩云雲生岱北天多雨水決淮壩地有魚蓋秋水之時先生正南下旋復北行至天津也。

是年八月以雲南

平特詔再行會試。穆補擢元文登進士一甲一名。

元譜穆案順治己亥進士履歷便覽徐元文榜姓陸庚子奉旨復姓又立齋序歷代宅京記曰曩者大廷對策謬荷先帝國士之知先生曷

曰必有體國經野之心而後可以登山臨水必有濟世安民之識而後可以攷古論今

同里葉方藹一甲三名。徐謔方藹字子吉號訥庵穆案訥庵方恆之胞弟也

是年詩有寄弟紆及友人江南三首山海關一首望夫石一首昌黎一首三屯營一首恭謁十三陵

一首。穆案十三陵者成祖永樂長陵仁宗洪熙獻陵宣宗宣德景陵英宗正統裕陵憲宗成化茂陵孝宗宏治泰陵武宗正德康陵世宗嘉靖永陵穆宗隆慶昭陵神宗萬曆定陵光宗泰昌慶陵熹宗天啓德陵凡十二陵合懷宗思陵爲十三也

王太監墓一首。穆案昌平山水記大行皇帝懣宮門外右爲司禮監太監王承恩墓以從死耐焉劉諫議祠一首。自注在昌平舊縣今廢諫案諫議名賁字去華昌平人元時以昌平驛官宮祺奏請始爲之立

祠元史泰定二年置諫議書院於昌平縣者此也居庸關二首重登靈巖一首秋雨一首與江南諸子別一首天津一首舊滄州

一首

作曳梯郎君祠記

十七年庚子四十八歲

二月至昌平。再謁天壽山入都。六月仍赴山東。秋南歸過六合。穆案車君以過六合為明年由浙回蘇後事。抵金陵。七謁孝

陵。元譜徐譜神道表云既謁長陵念江南山水有未盡者復歸六謁孝陵作詩云問君何事三千里春謁長陵秋孝陵是也穆案先生實七謁孝陵表云六謁誤是年長甥乾學中式順天舉人。元譜

女甥婿申稔舉南省鄉試第一。穆據憺園集補稔字叔旃號梅江吳縣人明大學士時行曾孫也先生又有姪女嫁太倉王吳弇州山人之裔也字維夏號碩園前明諸生善詩歌古文吳梅村歎其才為天下無雙已

未嘗大科薦力疾入試報罷旋卒詔授中書顧張思雪亭

筆記曰碩園娶亭林姪女少受業於亭林故學有根柢云

先生是時寓居淮上案書吳潘二子事云潘子刻國史攷異三卷寄余於淮上即謂是年也贈黃師正詩揚州九月中煨芋試新酎又顧與治詩序云冬余過六合沈子遷出與治詩一編皆先生此年南歸

後行蹤也。徐譜

是年詩有再謁天壽山陵一首送王文學麗正歸新安一首。元譜自注生舊在金侍郎聲幕府案金正希聲於順治乙酉募鄉勇起義徽州十月大兵破之殉難

續答徐甥乾學一首白下一首重謁孝陵一首贈林處士古度一首。元譜古度字茂之一字那子福清人時年已八十一亂後僑寓金陵著有茂之詩選

贈黃職方師正一首。元譜自注建陽人案職方生平無攷釋詩意當亦受唐王職既敗而遁於金陵者

作願與治詩序。元譜謙案與治字夢游江寧貢生河南副使瓌之曾孫當選官棄去王偉今世說述其軼事頗詳穆案車君以與治詩序爲明年辛丑作案云此過六合作願詩序一則元譜未載今攷車君蓋誤以歸次揚州爲今年事

故誤以序中明年字屬之辛丑也

十八年辛丑四十九歲

是年爲明桂王永歷十五年七月緬酋殺由榔從官十二月獻由榔於大軍明年四月殺於雲南。徐譜

回蘇至杭州渡江謁禹陵弔宋六陵。閏七月仍返山東。十二月立春日輯山東攷古錄成。元譜穆案四庫書

提要存目載此書云王士禛居易錄記炎武嘗預修山東通志或是時所遺稿本未可知也案居易錄明言通志修於癸丑是爲康熙十二年也提要誤。
是年申稔成進士。穆補。稔由內閣中書改禮部主事進郎中出爲廣西提

學僉事

是年適越往來皆由吳江之江村書潘吳二子事云余往越州兩至其廬蓋至吳江即訪潘力田也。徐譜

是年詩有杭州二首。元譜指潞王監國時事禹陵一首宋六陵一首顏神山中見橘一首。元譜山在益都許翰案今爲博山縣爲餘姚

呂裁之章成作呂氏千字文序。元譜謙案餘姚縣志章成字裁之號秋崖大學士本曾孫與陳函輝張明弼楊體元爲意氣交函輝從事紹興薦章成爲翰林待詔章成曰俾將驕兵日事寇抄越城中顛隳狼狽

歿死不遠，豈復可爲之日邪？卒辭不赴，函輝死，章成走，哭於台州，意有所觸，則惘惘獨行，欲得異人而友之，訪戴易於鄧尉，遇顧炎武於昌平山，慷慨賦詩，歷吳、齊、燕、粵，無所遇，乃歸，名其藏書之室曰「蓼園」，曰子集於蓼，誰謂茶苦者，病中自燬其著述曰：此無用之虛談也。所存有浴日樓集八卷、秋崖詞，據志載：識先生於昌平山，先生自己亥、庚子、壬寅、甲辰、己酉、丁巳先後凡六至昌平，此作序時已再至，當是與章成相遇後矣。

康熙元年壬寅五十歲

正月由山東入都。三月至昌平。三謁天壽山。十九日謁懷宗橫宮。元譜：昌平山水記：大行皇帝御宇之日，未

里餘，遣工都右侍郎陳必謙等營建未畢，而都城失守，賊以大行皇帝、大行皇后周氏梓宮至昌平州之土民，率錢募夫葬之。田妃墓內移田妃於右，帝居中，后居左，以田妃之椁爲帝椁，斬蓬壺而封之，後乃建碑亭各一座，門三道，殿三間，無陸兩廡各三間，有周垣而規制狹小，昔宋之南渡，會稽諸陵皆曰橫宮，實陵而名不以陵，春秋之法，君弒賊不討，不書葬，實葬而名未葬，今之言陵者名也，未葬者實也，實未葬而名葬，臣子之義所不敢出也，故從其實而書之也。出古北口往薊州，仍

至昌平。五月二十八日先生誕辰，有致饋者，作書辭之。至真定之新樂。元譜：日知錄：木刀溝條自注：余過新樂，林君華晚見示所修縣志云

云：穆案：順治十八年，縉紳新樂知縣林華晚，凝山福建莆田人，拔貢。抵曲陽，謁北嶽恆山。元譜：穆案：金石文字記：北嶽廟李寬詩下云：右詩在真定府曲陽縣北嶽廟中，廟有唐時大碑五，其上層爲積土所蓋，而余至時倉卒

求梯不可得，止就下方讀之云云。至井陘。十月至大同之渾源州。元譜：度汾河至平陽府。元譜：是年公肅甥以江南奏銷案

聖誤，謫官變儀衛經歷。穆據有懷堂集補

是年詩。有有事櫜宮時聞緬國之報一首。古北口一首。五十初度時在昌平一首。元譜。日知錄。生日錄下。自注。余昔年薊門生口。

有致餽者。北嶽廟一首。井陘一首。一鴈一首。徐譜。先生之西征也。以初冬就道。故井陘詩云。整。冰當路白。一鴈詩云。一鴈渡汾河。河邊積雪多也。堯廟一首。元譜案。臨汾志。堯陵。

在城東七十里。有廟。有金泰和二年碑記。先生於日知錄帝王陵。

條詳載諸說。頗以臨汾志為疑。是時先生經游其地。故有此作。

有謁櫜宮文。郡國利病書序。北嶽辨。

二年癸卯五十一歲。

正月自平陽登霍山。

元譜。謙案。詩有春雪覆杉松句。故知當在正月也。穆案。金石文字記。霍山廟建文碑下云。右小石刻在霍山中。鎮廟西壁上。余行天下。見洪武永樂以來。祭告岳瀆之文。及它碑記甚多。獨未有建文年者。乃此

文雜於數十百碑之中。而字畫完好無缺。故亟錄之。游女媧廟。

元譜。在趙城縣東八里。

至太原訪傅處士青主。

元譜。傅名山。字青主。初字青竹。號喬廬。別號公之。它陽曲人。少受知於袁臨侯。繼成崇禎中。臨侯總

督九江軍務。為巡按御史張孫振誣劾被逮。山職納粟贖。伏闕上書白其寃。馬君常作義士傳。比之裴瑜。魏劬亂後。為道士裝。以醫為業。工詩文。書畫入逸品。康熙己未。召試博學鴻詞。不應。授中書舍人。復不就。穆案。臨侯於崇禎七年。由主客員外郎擢山西提學。會

事。巡按御史張孫振。因請屬不應。誣劾之。其總督九江軍務。則在崇禎十五年。元譜敘述殊舛。又案青主生於萬曆三十四年丙午。長先生七歲。潛邱劄記。老友山右傅青主先生。顧甯人。極稱其識字。先生廣師儒云。蕭然物外。自得天機。吾不如傅青主。潘耒遂初堂

集。出太原郡城東行可七八里。有寺曰永祚。雙塔巍然。捐靈礙日。見之四十里外。浮浮若旌幢焉。其下為松莊。傅隱君先生所居也。十七史商榷。昔顧甯人宿傅青主家。晨未起。青主呼曰。汀芒矣。甯人怪而問之。青主笑曰。子平日好談古音。今何忽自昧之乎。甯人亦

不覺失笑。古音天呼若汀，明呼若芒，故青主以此戲之。穆案：天呼若汀，雖本之陳第毛詩古音攷，然實誤。與先生之論音不合也。青主一時戲言，故先生亦不復置辯。

至代州游五臺，與富平李子因篤遇。

遂訂交。元譜：李字天生，更字子德，陝西富平籍，山西洪洞人。邃於經學，著有受祺堂集。康熙己未試鴻博，授檢討，以母老辭，不許。表三上乃允。徐譜案：先生於康熙己未與子德書云：弟行年四十九，是子德生於崇禎四年辛未，少先生十八歲，而先生作

子德之父墓志云：崇禎七年因篤方三歲，三蓋四字之譌也。穆案：受祺堂集，酬杜讓水詩注，曹司農秋岳觀察大同，陳使君祺公分

藩，雁門予謂此凡八年。又王山史山志：天生從陳祺公於塞上，日事博綜，九經諸史靡不淹通，祺公視爲畏友，投契之深，有同骨肉。天

生以是無內顧憂，而益肆力於學。及祺公備兵雁平，攜以入代，復爲具棗資游，主組之英，篷幕之彥，俱與交歡。傅青主，顧甯人，朱錫鬯

輩，尤以古道相底厲。陝西通志：顧炎武嘗集杜句題贈，因篤云：文章來國士，忠厚與鄉人。鶴徵錄：富孫案：子德先生少孤，外祖田

時需，撫之成立，受業其門。吾鄉曹倦翁觀察三晉，先生以故人子相從，因善代州馮觀察雲驥，雅愛其風土人物，居旬注夏屋間者十

年。穆案：倦翁名溶，字潔野，又字秋岳，秀水人。崇禎丁丑進士，順治初由戶部侍郎出爲廣東布政使，左遷山西陽和道，裁缺候用，旋丁

母憂歸，不復出。雲驥，字訥生，代州人，順治乙未進士，就大同教授，官至四川提學僉事。在汾州聞執友吳赤溟炎、潘力田、檀章，遭湖州莊氏私史之難，遙祭

於旅舍。元譜：先生書吳潘二子事云：蘇之吳江有吳炎、潘樞章，二子皆高才，當國變後，年皆二十以上，並棄其諸生，欲成一代史

書，以繼遷固之後。會湖州莊氏難作，莊名廷鑑，目雙盲，不甚通曉古今，以史遷有左邱失明，乃著國語之說，奮欲著書，其居

鄰，故閣輔朱公國楨家，朱公嘗取國事及公卿誌狀疏草，命膏鈔錄，凡數十秩，未成書而卒。廷鑑得之，則招致賓客，日夜編輯，爲明書

書，冗雜不足道也。廷鑑死，無子，家貲可萬金，其父允城流涕曰：吾三子皆已析產，獨仲子死無後，吾哀其志，當先刻其書，而後爲之置

嗣。遂梓行之。慕吳潘盛名，引以爲重，列諸參閱姓名中，書凡百餘秩，頗有忌諱語。本前人詆斥之詞，未經刪削者，莊氏既巨富，浙人得

其書，往往持而恐赫之，得所欲以去，歸安令吳之榮者，以臧繫獄，遇赦得出，有吏教之買此書，恐嚇莊氏，莊氏欲應之，或曰：腫此而來

盡子之財不足以給。不如以一訟絕之。遂謝之榮。之榮告諸大吏。大吏右莊氏。不直之榮。之榮入京師。摘忌諱語密奏之。四大臣大怒。遣官至杭。執莊生之父。及其兄廷鉞。及弟姪等。并列名於書者十八人。皆論死。其刻書鬻書。并知府推官之不發覺者。亦坐之。發廷鑪之墓。焚其骨。籍沒其家產。所殺七十餘人。而吳潘二子。與其難。方莊生作書時。屬客延予。一至其家。予薄其人。不學。竟去。以是不列名。獲免於難。謙案潘力田。與吳赤溟。同草劾明史。以實錄爲綱領。凡志乘文集。墓銘家傳。有關史事者。以類相從。稽其異同。核其虛實。爲國史攷異一書。頗有稱許之者。所著又有松陵文獻若干卷。

由汾州歷聞喜縣之裴村。拜晉公祠。徐譜

取道蒲州入潼關。游西嶽太華。過訪王

山史宏撰於華陰。

元譜山史名宏撰。字無異。華陰人。明諸生。康熙戊午。以鴻博徵不赴。書學好古。收藏法書。名畫。金石。最富。居於華下。有讀易廬。撰易象圖述。及山志砥齋集。穆案廣師云。好學不倦。篤於朋友。吾不如王山史。先生又有送

韻譜小帖手蹟云。王無異名宏撰。一字文修。號山史。住華陰縣西嶽廟南小堡內。故少司馬公之子。關中聲氣之領袖也。

至西安。

元譜穆案長安詩云。積雨乍開。凄其秋已半。是先生以八月至西安也。

游富平館李

子德家。

徐譜見寄劉大來詩注。

又西至乾州。徐譜

十月。過訪李處士中孚於盤屋。遂訂交。

元譜處士名容。字中孚。盤屋人。少孤力學。經明行修。事寡母。彭尤以

孝著。康熙戊午。以鴻博徵不赴。當事強迫之。昇至近郊。操刀欲自戕。始得謝病歸。穆案處士生於天啓七年丁卯。少先生十四歲。二曲集處士年譜云。癸卯十月朔。東吳顧甯人來訪甯人。博物宏通。上下古今。靡不辨定。既而歎曰。堯舜之知而不偏。物急先務也。吾人當務之急。原自有在。若舍而不務。惟驚精神於上下古今之間。正昔人所謂拋卻自家無盡藏。沿門托鉢效貧兒也。甯人爲之憮然。又廣師云。堅苦力學。無師而成。吾不如李中孚。往驪山訪明宗室存杠。元譜存杠。字誼泮。存杠命子烈。及甥王太和受業。徐譜案先生後有寄伯常並二門人詩。穆案王山史山志。青門七子。皆宗室之賢。而薦於學者也。各有詩文集。卓然成家。余所及與之游者。子斗翁而已。亂後數往省之。翁

亦喜余嘗對人有松柏之譽。翁子伯嘗存杠年長於余。以翁與余善。而待余以執友之禮甚恭。然余固尊事翁。不敢以厲行進也。嘗與顧亭林言及亭林入青門。特訪其家。時翁已歿。見伯嘗素翁著作。讀之。因爲之序。今伯嘗亦歿。其子孫冒楊氏。蓋從翁之母姓也。

出關至太原。元譜。

先生答汪茗文書云。年過五十。乃知不學禮無以立之旨。又與人書云。某自五十以後。篤志經史。其於音學。深有所得。今爲五書。以續三百篇以來久絕之傳。而別著日知錄。上篇經術。中篇治道。下篇博聞。

共三十餘卷。

徐譜。茗文。號鈍翁。長洲人。順治乙未進士。由主事召試鴻博。授編修。著有幾峯詩文鈔。穆案。茗文。生於天啓四年甲子。少先生十一歲。

是年詩有元旦一首。霍山一首。女媧廟一首。晉王府一首。贈傅處士山一首。誄傅處士一首。陸來復述代許曦草疏攻鄭鄮事一首。詠史一首。李克用墓一首。五臺山一首。誄李處士因篤一首。送申公

子涵光一首。

穆案。送韻譜小帖云。申冕。名涵光。永年人。太僕公之長子。今庶常隨叔之兄也。太僕公甲申殉國。難案太僕公名佳。允。證節愍。隨叔名涵盼。順治辛丑進士。冕孟著有聰山集。

誄史庶常可程一

首。

元譜。可程。字赤豹。大興籍。祥符人。崇禎癸未進士。閣部可法同祖弟。京師陷。可程降賊。賊敗南歸。可法請置之理。福王以可法故。令養母。可程遂寓南京。後寓宜興。閱四十年乃卒。穆案。審親王致可法書所云。入關破賊。識介弟於清班者。謂可程也。

祭吳潘二節士一首。寄節士之弟末一首。

元譜。末字次耕。號稼堂。康熙己未。以布衣試鴻博。授檢討。受業於先生。又得王錫闡及兄禮章之傳。凡詩古文曆算聲音之學。罔不窮極根源。著有

遂初堂集 穆案次耕生於順治三年丙戌少先生三十三歲

王官谷一首 蒲州西門外鐵牛一首 潼關一首 華山一首 驪山行一首 長

安一首 乾陵一首 將去關中別中尉存杠於慈恩寺塔下一首

作五臺山記 裴村記 復庵記 貞烈堂記 朱子斗詩序

穆案靜志居詩話 誼斗 秦愍王九世孫 有集 才情橫溢 極爲富平李孔德所稱 覽其祀籠千一百二十字 雖未悉工 而浩

斷不可及也

三年甲辰五十二歲

正月五日 至蒲州之榮河 游后土祠 適汾州

元譜 穆案金石文字記 今汾陽有大相小相二村 相里氏之後 尙有數十家 因攷北齊寺碑題名 多相里氏 至今千有餘年 而裔孫猶居於此 不

獨晉俗淳樸 而山谷之險 猶足以自保 故能累代不遷 若山東河南 則兵火之餘 人民散亡 欲求元時遺族 已寥寥不可見矣

自大同至西口入都 七月 至昌平 四謁天壽山

奠懷宗櫬宮 至河南輝縣 訪孫夏峯先生

元譜 穆案先生丙午年 送韻譜小帖云 孫徵君名奇逢 字啓泰 容城人 今住輝縣 萬曆庚子舉人 今年八十三 河北學者之宗師也 元譜 夏峯先生

年十七 領鄉薦 嘗參高陽孫承宗 督師關門軍事 與左忠毅 魏忠節 周忠介 相善 天啓末 三公忤逆奄 相繼逮繫 先生拮据調護 供饗 饋 遣弟奇彥 同鹿監軍 善繼子 馳書督師 求援 督師因上疏 以邊事請 陸見都門 喧傳興兵 至關 逆奄聞之 繞御牀 泣 督師方抵通州 降旨勒回 諸公途不免 崇禎丙子 容城被圍 設方略拒守 城賴以全 事聞 特詔褒嘉 寇氛漸逼 移家五峯 順治初 復移家輝縣 之夏峯 生平讀史 談道 務爲聖賢之學 兩朝徵聘 凡十一 次 輒堅謝不出 康熙十四年卒 年九十二 返至泰安州 度

歲。元譜。

是年詩有后土祠一首。龍門一首。自大同至西口四首。有事櫓宮一首。贈孫徵君一首。

有謁櫓宮文。

四年乙巳五十三歲。

由泰安至德州。復回濟南。置田舍於章邱之大桑家莊。

元譜。先是章邱人謝長吉世泰。負先生賞若干。至是以田產價為謙案。靜志居詩話。謂先生兵後盡鬻其產。寄居章邱。別

治田舍。久而為土人攘奪者此也。又先生甲寅年。有刈禾長白山下詩。案長白山在章邱長山二縣之交。刈禾處。即桑家莊產業也。

秋。至曲阜。再謁孔林。游闕里。

元譜。

與顏修來。光敏訂

交。穆據手蹟補札。見丙午。修來。一字遜甫。曲阜人。康熙丁未進士官吏部考功司郎中。著有樂圃集。

是年詩有訓程工部先貞一首。

元譜。先貞。字正夫。德州人。明工部侍郎。紹孫。以祖廕。歷官工部員外郎。濟南府志。工部告病歸家。居二十年。以扶風教。崇簡樸。相勸勉。里中節義之事。搜采成秩。年六十七。豫製一

棺。題曰。休息庵。所著有燕山游稿。蕙庵詩草。若干卷。穆案。復社姓氏。先貞名列德州弟一。

有與修來手札云。詩本音二册送上。中有駁正者。乃衛太史筆也。此書未定。不必鈔錄。只將坊刻詩經一本圈注。其不合及太瑣碎者。置之可也。更乞教正。為荷。底事一有信。即求示之。穆案。此札以丙午札推之。知當在此年。蓋與修來初識面時也。衛太史名

既齊字爾錫，猗氏人。康熙甲辰進士。又案：手蹟向藏修來先生家，頃歸湖北。荆宜施道陶君樾所穆於戊戌春，獲觀錄副存之。後凡言手蹟及手札者皆同。

五年丙午五十四歲。

春由大桑家莊過兗州。

穆據手蹟補。

至廣平之曲周。

游太原時，秀水朱錫鬯、彛尊、客晉藩署，過訪先生於

東郊，因與訂交。

元譜：謙案，彛尊字錫鬯，號竹垞，以布衣試鴻博，授簡討。徐譜案：竹垞年譜，康熙四年秋至太原，五年春客山西，布政王公顯祚幕，其年二月游晉祠，三月游風峪。先生贈詩言殊域送良辰，又云草沒青驄晚，霜浮白墮春，則相

見必於春也。穆案：竹垞生於崇禎二年，己巳少先生十六歲，廣師云文章爾雅，宅心和厚，吾不如朱錫鬯。

南海屈大均亦自關中來會。

元譜：曝書亭集注，屈五少為番禺諸生，名紹隆，謙案，屈字介子，一字翁山，為信

名，今種字靈一，後加冠巾，池北偶談，屈介子適秦隴，與秦中名士李因篤輩為友，作華岳百韻，固原守將某見而慕其才，以甥女妻之，自固原攜妻至代州上谷，再游京師，下吳會，自金陵歸粵。徐譜：健庵有懷舅氏詩云，自別維亭二載餘，風塵驅走近何如，健庵曾游太原，疑是時與先生相遇也，維亭俟考。

出雁門。

元譜：穆案，重至代州詩云，雁門春草碧，且復過渾沱，蓋在三月杪也。

適應州。

重過大同，遇故代府中尉俊晰，訪李

子德於代州牧陳祺公上年署。

元譜：上年字祺公，清苑人，順治己丑進士。

與子德輩二十餘人，勾贊墾荒於雁門之北。

元譜案：先生與潘次耕書

有云：近稍貸資本於雁門之北，五臺之東，應募墾荒，闢草萊，披荆榛，而立室廬。又云：彼地有水而不能用，當事遣人到南方，求能造水車，水碾，水磨之人，與夫能出賞以耕者。又云：北方開山之利，過於墾荒，畜牧之獲，饒於耕耨。云云。穆案：據王山史山志，則子德即以是年返秦。入京師，復往山東游泰山，謁天慶宮。十月著韻補正成。至兗州守署度歲。元譜：穆案，兗州志，此年知府為彭繩祖。

質生黃安人。

是年公肅甥復原官未任以父憂歸。穆據有懷堂集補。

是年詩有寄劉處士大來一首。元譜處士無攷玩詩中云蓋山左人而嘗客代州牧幕者。朱處士彝尊過余於太原東郊一首。屈山

人自關中至一首。重過代州贈李處士一首。出雁門關一首。應州二首。重至大同一首。元譜日知錄九族一條自注余

丁未歲在大同。過代州中尉俊晰。年近五十。攷其世次於孝宗。為昆季云云。案先生游代州。在丙午年。丁未則未嘗至代。編年詩集。系此詩於丙午。原自符合。或日知錄誤寫作丁未耳。得伯常中尉書卻寄一首。

作聖慈天慶宮記韻補正序。

是年先生有寄顏修來手蹟云。去秋得接光塵。恨首路匆匆。未獲信宿之謂。以聆微言而商大業。至於四方同人。遙相問訊。無不仰贊宏才。以為今代復有知十之姿。庶幾之品也。仲春偶過兗署。未得親詣闕里。再侍雅譚。專俾齋所刻韻譜。呈正大方。至前日所留詩本音稿。係未改定之書。其中有舛誤者。拈寫二條附上。閱過粘卷內付還。它日當攜全書奉觀。更求指誨耳。率爾未盡。徐譜以此札系之四年乙巳。去秋得接光塵。下附案云。前札云。即過兗州。又云。諸容面悉。必修來於去秋。自關中歸。兗與先生晤也。穆案先生以韻譜寄人。是一時事。據送書小帖云。孫徵君。今年八十三。知必是丙午。云去秋得接光塵者。先生於乙巳秋。謁孔林游闕里。與修來相晤也。蓋前札雖云。即過兗郡。而實於泰安度歲。未即踐言耳。

又一通云。捧讀大筆。清新嫵逸。逼似唐人。所謂不意永嘉之末。復聞正始之音者矣。舊刻二册。乃五六年前作。中有誤韻。幸為藏之。河北關中書共六書。馳上姓氏居址。別開一紙。煩照單分致。

又一通云。昨枉顧。以主人不在。率爾慢去。殊深不安。統俟文旌東過。面頌。并求惠示。西征大作耳。長路關山。濁涇清渭。千維珍重。且起作書。數千字。恐使人來取。匆匆遂不能詳。

又一通云。魯公書家廟碑。多寶塔碑。爭坐位帖。俱在西安府學。俗所謂碑洞者。其所書郭敬之家廟碑。在布政司內。奉使棗州題字。并石刻像在同州。臧懷恪碑在三原縣碑洞中。石經及漢唐字。但有錢即可買。不必用官府。惟各州縣古碑。非官府不能致。然多是唐碑。惟郃陽曹全碑極佳。其他若麟游之九成宮碑。長武之虞恭公碑。俱佳。若多印得曹虞二碑。各一幅。見惠。最感。穆案。以上三札。當在修來徽裝西征之時。

又一通云。弟以今六月至鴈門。時李君天生自關中來言修來社翁。在方伯署中。不多會客。初秋入都。而敝鄉沈釋老亦自關中來。交相推許。計太華終南之勝。二嶠函谷之阻。周秦漢唐之蹟。並已收載之行笈矣。山史兄。楊王兩敝門人。並得一見否。石珍社翁。想閉戶著書。臥遊五岳。胸中當別具一邱壑。而鴻文大製。日新富有。則兩君固並驅中原矣。弟頃至岱下。俟主人之歸。即過兗郡。先此奉候。并問秦中諸子消息。所畱詩本音。乞付下。已大加刪改。將以新本就正也。諸容面悉。不既百一。穆案。徐謔以此札系之三年甲辰。以元譜證之。蓋前札在春末。此札在冬仲也。所云六月至鴈門。乃重至大同時事。所云楊王兩門人者。據送韻譜小帖云。楊伯常名謙。故王孫也。住西安府南八里。大塔堡內。大塔者。慈恩寺塔也。或駕在藩司署中。則求於到日。即遣人致之。又云。共書六封。各送韻譜一本。伯常則二本。故有七本。案楊氏何以爲故王孫。以字伯常。及住大塔堡攷之。蓋楊謙卽朱存杠。鼎革後變其名氏也。大塔卽前與存杠別處。獨寄韻譜二本者。存杠之子烈甥。王太和皆受業於先生。所謂楊王兩門人也。沈釋老者。沈荃。字貞蓀。號釋堂。華亭人。順治壬辰翰林。又案。頃借得王山史山志有云。伯嘗歿。其子孫冒楊氏。喜臆淵之不爽也。詳見癸卯下。

又一通云。大作清勁。無一俗筆。太華伊闕諸作。爲集中第一。思悲翁戰城南。亦有白傅諷諭之遺意。大雅之音。將復起於今日矣。敬服敬服。元稿返上。略商數字。識以浮粟。未知有當否。諸容晤悉。穆案。此上二札。當在西征既還之後。又有不得其年與事者三通。附載於此。一通云。仙舟一晤。良豁積懷。王程靡及。不獲攀爾信宿。以罄願言。猶爲耿耿耳。所寄書版。乞付去。伴家訓如命。勸正容於秋仲入都。面奉率此附候。不悉。

又一通云。昨出抵暮始歸。承駕左顧。失逆爲罪。家訓勘畢。送上井用硃筆。以便一覽。即得幸爲另鈔一本。仍乞原本見賜。感感。

又一通云。弟淺至城中。尙未拜呈。老社翁須兩三日。以未申二時。過我。則得晤矣。大才何藉弟筆。想未見刻啓耳。附上一紙。不盡。

六年丁未五十五歲

春留兗李署。刪訂近儒名論。甲集。

穆補。先生與修來手蹟云。弟向日錄有古今集論五十卷。頃兗李劉年翁延弟至署。刪取其切於經學治術之要者。付諸梓。人名曰近儒名論甲集。因此淹留。尙有旬月。如貴地

友人家。有鄴架之藏。欲一就觀。且得以晤言講習。尤幸事也。日下欲借唐荆川稗編第一套。鈔錄幾首。未知可轉覓否。大小阮才名。已達之當事。如便中至郡。可投一刺。極相企慕也。新詩并乞惠示。以便奉揚。休譽燭下草此。附啓不盡。穆案。兗州府志。同知表。劉澤遠。恩貢。安化人。康熙八年任。所謂兗李。疑卽其人。八年或六年之譌。或先題署。後實任。未能臆決也。修來卽以此年成進士。足證編書爲正二月間事。徐譜。大小阮才名者。修來與叔伯珣俱有時名也。穆案。伯珣字季相。明河間府知府。允紹次子。以陪祀特授壽州州同。修復芍陂之利。工詩古文。著有祇芳園集。

南歸至山陽。主王起田家。

開雕音學五書於淮上。張力臣。邵父子。任校寫之役。元譜。

力臣。山陽諸生。號亟齋。以賣書畫爲生。尤精六書之學。贊而書古。多集金石文字。有昭陵六駿圖贊。焦山瘞鶴銘攷。傳於世。許瀚案。又有濟寧學宮漢碑釋文。濟寧潘氏警刻之。而所傳不廣。穆案。五書後序。若夫本說文正字體。酌古今之間。而手書之。則張君。邵與其二子。叶增。叶箕。又廣師云。精心六書。信而好古。吾不如張力臣。健庵有題張力臣小像七絕二首。其次章曰。奇字揚雲未渺茫。茂先家法在巾箱。對君轉復思元歎。洒淚風前誦渭陽。自注。力臣方爲舅氏。亭林校刻音學五書。受祺堂集。有寄力臣詩曰。一代儒宗同所向。叩須金石正皇初。自注。謂甯人先生時所著書。多屬君校刻。潛邱劄記。甯人著有字書五種。託力臣繕寫。授梓。力臣曾寄一樣本來。果博且精。不可及也。

北行抵曲周。拜路文貞公祠。入都。

從孫思仁借得春秋纂例、春秋權衡、漢上易傳等書、清苑陳祺公資之薪水紙筆、傳寫以歸。元譜詳見鈔本自序

案先生有手札云、弟爲一二相知所囑、似須秋杪方可行、昨諭鈔書者、能爲弟寬二人否、又一通云、弟以校讎之忙、不及親叩、專經走送、別有一函、求投入理、畧令叔先生并希致知己之言、不敢忘、惟努力讀書、以庶幾無負相期之意也、二札疑皆在是時。

東還主德州程工部正夫、李刑部紫瀾家。元譜李名濤、號流齋、芮城令、李霖瞻、弟、康熙丙辰翰林、官至刑部侍郎。

是年詩、有淮上別王生略一首。徐譜案、王略、因先生之故、以女妻潘耒、是年耒來至山陽、成昏於王氏、見稼堂撰亡妻王孺人壻誌、特先生別王略時、稼堂尙未至淮上耳。贈蕭文學企

昭一首。穆案、企、昭、字文超、漢陽人、順治丁酉、副榜貢生、四庫書存目、收企昭性理譜五卷、云其書大旨在於伸程朱、而闢陸王、與熊賜履閑道錄所見同。拜路文貞墓一首、過程工部一首、

過蘇祿國王墓一首。謙案、蘇祿國、在東洋海中、地近淳泥、瀾瀾、自古荒服之地、不通中國、相傳其國分爲東西峒三王、而以東王爲尊、明永樂十五年、三王並率其妻子來朝貢、因並封爲國王、居二十七日、三王辭歸、其東

王次德州、卒於館、遂留葬、乃遣使封其長子爲蘇祿國王、十八年、西王遣使入貢、十九年、東王母遣使貢大珠一、重七兩有奇、十二年復入貢、自後不復至、本朝雍正五年、始通貢、乾隆十九年、請三年一貢、奉旨五年一貢、由福建巡撫代題、自廈門入境、

達京師。

作音學五書序、程正夫詩序、

是年六月、陳祺公重刻廣韻於淮上。王山史山志、李子德嘗得廣韻舊本、顧亭林言之、陳祺公託張力臣爲錢木淮陰、此唐人所用之韻也、徐譜案、潘稼堂重刻古本廣韻序云、先師顧亭林先生深

明音學實始表章。此書刻之淮上。然其所見。乃內府刊本。已經刪削者。久而覺其書之不完。作後序以志遺憾。穆案先生蓋誤以宋陳彭年等重修廣韻爲廣韻足本。故疑此本已經刪削也。稼堂竹垞亦同此見。四庫總目提要辯之最覈。

七年戊申五十六歲

春在都寓慈仁寺

徐譜慈仁寺在廣甯門大街。額曰大報國慈仁寺。穆案受祺堂集奉答先生贈詩五十韻。有云憶折前津柳。同炊古寺羹。自注前年與先生同客慈仁寺。予先別去。按卽此年春事。蓋子德既去之後。先生始聞黃培

獄事東行也。道光二十三年夏。何太史紹基。尙實爲先生建祠堂於寺西偏。隙地一區。架屋三楹。凡筮禮器悉備。歲春秋致饗祀焉。二十四年落成。二月十四日辛亥。公祭。穆撰文曰。先生生當叔季。業貫漢唐。學域爲王者師。志非以名山老身。甘荒遐。慰九原貞孝之心。時際雲霓。灑六謁園陵之淚。北征初賦。策二馬以來游。東道旣通。餽十盤而恐後。咨民生之利病。邑乘必搜。究阨塞之險夷。邊亭親歷。采山鍊冶。喻半生尙論之精勤。訂韻諧聲。發萬古同文之要眇。況乎志存淑世。婁構書堂。雅慕伏波。厲精田牧。臯比不擁。懲東林復社之末流。墨突未黔。棄濂涇桑莊如敝屣。惟慈仁之古寺。曾作寓公。計偉節之邁行。適在明日。誦孔德炊羹之句。下榻何類。緬無異築室之謀。顧廬宛在。荆榛乍啓。鴈豆初饗。規陋雲臺。典同石室。所覲雲車風馬。旃蠶來臨。庶幾學海儒林。精神不朽。尙嚮。又五月二十八日祭文。先生行成忠孝。學洞古今。懲未造之蹈虛。進吾徒以考實。凡今代文苑儒林之彥。敬佩遺書。合天下束脩尙友之懷。思隆美報。專嗣式啓。吉祀祇饗。敢因載誕之辰。奉薦迎神之曲。雖薊門卻饋。痛援往例。於靈均而石室。修儀展效。拜經於榮緒。尙其陟降。鑒此悃忱。

聞萊州黃培詩獄牽連卽星馳赴鞫三月下濟南府獄

元譜先生手蹟云。康熙七年二月十五日在京師慈仁寺寓中。忽聞山東有案株連。卽出都門。於三月二日抵濟

南。始知爲不識面之姜元衡所誣。姜元衡者。萊州卽墨縣。故兵部尙書黃公家僕。黃寬之孫。黃瓚之子。本名黃元衡。中進士。官翰林。以養親回籍。揭告其主原任錦衣衛都指揮使黃培。見任浦江縣黃坦。見任鳳陽府推官黃貞麟等一十四人逆詩一案。於五年六月奉旨發督撫親審。事歷三載。初無干涉。忽於今正月三十日。撫院審時。稟稱有忠節錄。卽啓禎集一書。元衡口供。啓禎集二本。皮面上有舊墨筆寫忠節錄字樣。濟濟生所作。係崑山顧寄人到黃家搜輯發刻者。咨行原籍。逮證據其所告此書中有黃御史。宗昌印

坦之父。傳一篇。有云。家居二年。握髮以終。以爲坦父不曾剃頭之證。有顧推官（成）傳一篇。有云。晚與甯人游。有云。甯人所爲狀在。以爲甯人搜輯此書之證。不知此傳何人授稿。何人親見刻板。見在何處。此書得之何方。而就此握髮一語。果足以證已故二十餘年黃御史之不剃頭否。就此與游二語。果足以證甯人之卽顧甯人。又卽搜輯此書之人否。且讀邸報。此書已於六年二月。曾經沈天甫出首矣。請略言之。昔敝郡有陳明卿先生。以壬戌探花。官至國子祭酒。好刻古書。有資治通鑒。大學衍義等書。一二十種行世。其子濟生。亦好刻書。濟生已故。有光棍施明者。從海外來。與沈天甫等合夥。僞造此書。假已故陳濟生之名。而羅江南北之名士巨室。於其中。以爲挾害之具。又僞造原任閣輔吳牲一序。以騙詐其子。見任中書吳元萊。奉旨閣議。部議書內有名之人。共七百名。內有寫序寫詩。譏傷本朝之人五十餘名。合行查究。奉旨沈天甫、夏麟奇、呂中、逃走之施明。未來之吳石林。及代主控告之葉大等。合夥指造逆詩。肆行騙詐。雖稱逆詩從海外帶來。茫無憑據。又云。編詩之陳濟生。久經物故。而從海內帶詩之施明。又經逃走。此等奸棍。嚇詐平人。搖動良民。誣稱謀叛。以行挾害。大千法紀。爾部卽將沈天甫、夏麟奇、呂中、葉大。俱行嚴審。擬罪具奏。逃走之施明。未來之吳石林。俱著殿行緝拿。獲日也。著疑罪具奏。刑部審得沈天甫等供稱。騙詐吳中書銀二千兩。未給。將此書出首欲圖三品前程。是實。奉旨將沈天甫、夏麟奇、呂中、葉大四人。於閏四月二十二日。押赴西市處斬。施明、吳石林、緝拿未獲。今元衡所首之書。一百二十餘葉。與沈天甫之三百一十六葉者。雖刪去頗多。而詩卽啓禎之詩。傳卽此詩之傳。編造之人。卽陳濟生。其爲一書。不問可知也。恭釋明旨。不直曰陳濟生。而加以又云二字。又云者。據沈天甫之所云。是已故之濟生。聖明猶爛其誣罔。而元衡欲以此牽事外之人。而翻久定之案。其南北通逆一稟云。據各刻本。山左有丈石詩社。有六社。江甯有吟社。有遺清等社。皆係故明廢臣。與招挈懷貳之輩。南北通信。書中確載有隱叛。與中興等情。或宦孽通奸。或匹夫起義。小則謗讟。大則悖逆。職係史臣。宜明目張膽。秉筆誅逆。故敢昧死。陳揭逆刻種種。罪在不赦。北人之書。削我廟號。仍存明號。且感憤乎鴟張。虎豹乎王侯。南人之書。以我朝爲東國。爲虎穴。以僞王爲福京。爲行在。北人之書。曰斬虜首。黃培刻郭汾陽王考傳中。有斬首四千級。捕虜五千人。乃子儀敗安祿山兵紀功之語。擁胡姬。征鐵嶺。黃培詩。有云。怨女金闈裏。征夫鐵嶺頭。殺金微。又有思漢威儀。紀漢春秋。南人之書。有黃御史握髮一傳。又有起義。有勸衛王倡義。及迎

魯王、浙東王、上益王等事。又有吳人與魯藩舟中密語。又有平敵將軍。有懸高皇帝像慟哭。及入閩入海等事。北人之書。有含章館詩集。友管軒詩集。夕霏亭詩。郭汾陽王考傳。南人之書。有啓禎集。卽忠節錄。歲寒詩。東山詩史。做文信國集。子美句百八十章。其北人則黃培所刻。十二君唱和序跋等人。其南人則啓禎集所載姓名籍貫。俱在刻本中。約三百餘人。是元衡之意。不但陷黃坦。陷顧甯人。而并欲陷此刻本有名之三百餘人也。不知元衡與已斬之沈天甫。逃走之施明。何親何故。何以得此海內帶來之書。而前唱後和。如出一口。其與不識面之顧甯人。刻本有名之三百餘人。何驪何隙。而必欲與黃氏之十二君者。一網而盡殺之。推其本意。自知以奴告主之罪。律所不赦。欲別起一大獄。以陷人。而爲自脫之計。遂蹈於明旨。所謂嚇詐平人。擣動良民。誣稱謀叛。以行挾害者。而不覺也。天道神明。不愷不濫。今於三月四日。束身詣院。投到。伏聽審鞫。至教唆陷害。別有其人。尙容續布。統惟詳察。江南衣布顧甯人。頓首。穆案。進士履歷。便覽。黃元衡。字元璫。卽墨縣籍。膠州人。順治己丑科。會試十八名。欽授內翰林國史院庶吉士。辛卯。升宏文院編修。曾祖繼節。祖寬。父瓚。又黃貞麟。字振在。卽墨人。順治戊戌。會試二百八名。戶部觀政。庚子。授江南鳳陽府推官。曾祖兼善。廩生。祖宗曉。潞安衛經歷。父澤。庠生。又手札云。在都時。極荷惓惓之愛。今姜元衡。振及弟名。具題請旨。弟已赴濟南投到矣。先有一札致譚年翁。業詳此事。始末。念知己聞之。必倍懸切。謹此布啓。前沈天甫所指造陳濟生逆書。有序。有目。有詩。有傳。原狀稱共三日一十六葉。今元衡所首之書。無序。無目。無詩。止傳一百餘葉。知卻中原書已燬。刪去。天甫狀中。已經摘出者。稱另是一書。據元衡南北通逆情。由一揭。欲借此書。另起大獄。而羅書內有名之三百餘人於其中。以翻主僕名分之案。不知就此百餘葉中。篇篇有濟生名。則卽此一書之明證也。奉旨爲沈天甫指造之書。卽以故之陳濟生尙屬誣罔。而况餘人乎。弟敢不惜微軀。出而剖白此事。尤望大君子主持公論。此札仍乞傳與譚年翁一觀。并以告諸吳越之同聲氣者。廣韻。雷程宅。候取不盡。又一通云。前有一函。想已徹覽。弟不遵明哲之訓。果有此累。今江夏之驕吝。足以致敗。而與之同事。奈何。何南冠而繫。竟不得出。一切詳之舟老書中。惟知己爲之壯。孫懸切懸切。餘語去。价能道不悉。又一通云。弟來此區區之意。尙未得少申爲歉。二十四日出都。前往歷下。知有札寄。示乞寫德州北李宅家報。付報房封遞。三四日可達。李老先生諱源。字星來。原任河津令。與弟交頗密。卽爲專人齎至。書城也。事畢。再容趨至九頓。報至德州。先到蕭宅。次卽傳至。

李宅有二李。故稱北以別之。又一通云。來諭悽悽。深感愛厚。所云屢有言相致者。止於舟札見之。它皆未到。即賦梅者。止有一札。無兩札也。所云但當力辯有無。勿牽別事。敬如台旨。箇中之書。昨至德州點簡。二日悉取而焚之矣。并復此中之事。大抵上有求而下不應。弟遂無保出之法。黃氏絕不照管。債主斷絕。日用艱難。莊田之麥。俱爲劉棍割去。每日以數文燒餅度活。何以能支。欲乞一問南夏諸公。若天生至晉。可爲弟作書。促之入京。持釐下一二函至歷下。必當有所濟。弟已別有字往關中矣。一切統希垂照。不宣。舟書可互觀之。穆案。子德答先生贈詩有云。客返關中路。書傳歷下城。自注。客秋有鄉人。至自濟南。拜先生書。又一通云。五月十九日院審。先取有同案中年者四五人。保識黃御史曾已剃頭口供。次辯啟禎集中。有甯人字。無顧姓。又不在黃御史一篇傳內。并審出章邱地土情由。惟問姜要顧甯人。輯書實證。無詞以對。又扳即墨老諸生杜廷交。此人從不識面。爲證。又展轉推出所從得書之人。爲萊陽縣孫榮之。乃積年走空之人。今并行提去矣。雖未保出。而是非已定。此皆上壘秉公持正。及大人君子爭號壯拯之力。惟有世世尸祝。茲因便羽。先此奉聞。元譜衍生案。云。是獄爲謝長吉主唆。長吉。卽乙巳歲坑賞不償。而以大桑家莊房產作抵者。是秋九月。先生與長吉對簿。始得開釋。穆案。翁玉濤聽竹山房詩話。謂亭林游濟南。爲一達官置之獄。蓋耳食之言。非實事也。子德答先生贈詩有云。莒萊矜野語。虞芮亂鷺聲。自注。訟起。因小人奪先生田。又云。欽權江波大。潛楊海汐輕。自注。時訟牒株累多人。用已結海上事。何紹基案。札中所稱撫院者。宛平劉公芳。國史本傳。公以順治七年任山東巡撫。康熙十一年始以憂去。在任者二十三年。嘗奏請緝盜。不得豫勒名數。以防捏陷。又賊證未明。不得以初供定讞。又請撤山東錢局。皆得旨允行。蓋仁明君子也。赴東詩序。墨蹟本有撫院劉公之語。後來刻集。乃刪去此節何也。徐譜案。是年春。竹垞至山東。客撫院劉公幕中。則先生之脫於患難。竹垞當與有力焉。穆案。顏修來有送朱錫鬯之濟南詩曰。攜手河梁悵去塵。歷山遙望柳條春。訟庭尙有南冠客。莫向燕臺思故人。自注。時亭林以詔獄在濟南。又案。札中屢稱譚年翁。及舟老者。譚吉璉。字舟石。嘉興人。明太僕卿。昌言孫父貞良。五經進士。舟石以監生試補宏文院撰文中書。遷延安同知。升登州知府。鶴徵錄。引亭林語云。舟石勤於讀經。叩其書齋。插架十三經。注疏。手施朱墨。始終無一誤句。我行天下。僅見此人。

六月十七日戌時。地連震數次。自北而南。聲如

雷城垣顛撲。文廟亦毀。同時被震者。濟南、兗州、東昌等郡。共五十九處。沂州、郟城、死傷尤甚。元譜。穆案。此年山東地

震事。漁洋年譜亦載之。又子德奉答先生贈詩。

經句喧地。坡舉國。句天晴。自注。時地震淫雨。

秋。從子熊來省於濟南。元譜。後隨先生入都。

十月。獄解得釋。元譜。先生手札云。弟於九月二十日保出。十

一月十日。一案之人。俱已赴院畫供。想有題結之望。凡所以入險能出。困而不墮者。皆知已扶持之力。當世世尸祝。不敢以楮墨宣矣。前具近詩六章。曾徹覽否。屢有札與舟公托其致感。而未見一報。豈其移寓。或石頭之沈浮邪。今有一函乞致之。近况詳之函中。可共覽也。旅食無依。暫寄徐玉老署中。不謂有延安之陞。則此中別無主人矣。萬老先生書已投。似蒙注念。院批取保。一宿便發也。弟候命下結案。即詣都中叩謝。如尙遲。則俟舍甥北上時。代弟九頓台堦。今來者玉老之僕屬。其三日後走領回書。沍寒不莊。幸宥。長至日弟名正具。穆案。徐玉老者。濟南府志。有徐眞修。遷安人。康熙中由拔貢官濟南通判。旋升延安同知。蓋即其人。

是年詩。有赴東六首。

徐譜詩有云。往再四五日。乃至攀髯時。是訟繫時。當三月十九日也。穆案。子德答先生贈詩有云。節至通蘋藻。自注。先生在難不廢時祭。

李子德聞余在難。特走

燕中。告急諸友人。復馳至濟南。省視於其行也。作詩贈之一首。

穆案。子德春懷詩之第五章。有云。歷下東湖青溟州。歷山東望白雲樓。深知鄒子繫。非罪敢謂

魯連排衆謀。欲陟岱宗俟。它日將觀滄海難。

久留。詠此年赴東馳救。及因疾先還事也。

歸元恭文鈔。有與先生書云。戊申春夏之交。聞兄以山左縉紳相騷之事。連及時適有海陵之行。無從問得確耗。秋間還從令甥處。知兄遂不免。汗獄私心憂之。未幾而得所寄書。及六詩讀之。深歎兄之善處憂患。張元節之亡命。雖幸免禍。君子譏之。兄乃自

論獄。不惟舉動光明。換之事。亦自宜爾。蓋兩姓交惡。而委罪於兄。兄身出則事白。事白則身全。兄之慷慨就獄。乃精於脫禍者也。但不知出獄之後。復栖遲何所。弟前書中戲詰三窟。後察之亦不甚確。惟濟上一窟是實。而聞又爲人所賣。趨趨免兔。幸脫於羅。將仍依此窟。抑復別尋窟乎。一笑。六詩已和得奉覽。其中迂怪不悛。及江南樂土等語。初非因此事而發。蓋別有爲。前書自言精於音韻之學。著書已成。弟未見及。但友人頗傳兄論音韻必宗上古。謂孔子未免有誤。此語大駭人聽。許瀚案語似駭人。實無可駭。傳語者不得其旨。卽未免駭人耳。先生於此道。復安有所謂僻也。歸君意深可感。其於韻學。殆亦未精。因此度兄學益博。則僻益甚。將不獨音韻爲然。其它議論。倘或類此。不亦迂怪之甚者乎。卻子語迂。單子知其不免。況又加之。以怪乎。此平生故人。所以切切憂之。願兄抑賢知之過。以就中庸也。向讀所寄山陵詩。忠義感激。使人泣下。願兄之去墳墓。十餘年矣。初因避讎。勢非得已。歲月既久。怨讎已釋。且今年讎家已盡。室赴任。更無所慮。柳子厚竄南方。惟以不得上邱墓爲恨。謂其祖先。曾不若馬醫夏畦之鬼。猶得享歲時之祭。彼以得罪不能歸。兄今欲歸。其執禦之。獨無邱墓之思乎。此又平生故人。所懇懇於懷者也。和詩不免局於短篇。未能盡達所懷。故復及之。令子定已長成。曾再索三索否。弟則屢抱山簡之痛。方深伯道之悲也。年來筆耕。僅能餬口。雖不閉戶。亦難遠遊。惟去歲爲先太僕遺集事。與季侍御相商。一渡長江耳。詩古文以乏人繕寫。不能遠寄。刻文一首呈覽。立齋太史北上。草此附候。便羽幸惠德音。

